

LOTHARINGIA  
MASCVLINA,

ADVERSVS

ANONYMV M PARISIENSEM:

AVCTORE

IOANNE IACOBO CHIFLETIO, Equite,  
& Regio Archiatrorum Comite.

ANNO M. DC. XLVIII.

NICOLAUS DE CLEMANGIIS,  
Archidiaconus Baiocensis, epistolâ xc.  
scripta anno Domini M. CD. XVII.

**D**ICET quis, contemnendum esse, quantum ad  
bella pertinet, DUCEM LOTHARINGIÆ;  
nec tantis pollere viribus, ut DOMINI audeat  
FRANCIÆ bellum inferre. Non debet parvus hostis vi-  
deri, quem DEVS excitat, & propter aliorum ADIV-  
VAT facinora.

# LOTHARINGIA MASCVLINA.

## C A P V T I.

*Lotharingia Superioris Ducatus ex lege Imperij  
ad feminas non deuoluitur.*



VCATVS Lotharingæ masculinitas tribus  
fulcitur fundamentis; SALICA LEGE, STATV-  
TO IMPERII, ET IVRE FAMILIARI. De lege  
Salicâ fusè differuimus in Vindicijs Hispanicis: Cap. 5.  
supereft vt agamus de alijs duobus; & primùm  
quidem de Imperij edicto.

Sanctè & salubriter in Imperio constitutum,  
vt maiora Feuda, ex primâ origine & naturâ  
suâ, militaria essent & masculina. Ratio conditæ legis hæc fuit;  
quòd Sacrum Imperium latè protenderetur, suæque maiestatis at-  
que gloriæ plures haberet æmulos; vnde Cæsaribus æquum visum  
est, regendas tuendasque Prouincias committere Principibus viris,  
qui animi magnitudine & constantiâ, iudicij & consilij acrimoniâ,  
bellique gerendi peritiâ ac solertiâ præditi, hostium conatus aduer-  
sos vi armatâ propellerent. Quod quidem munus cùm feminæ per  
se obire non possint, à Feudorum militarium possessione regulariter  
sunt exclusæ.

Sancitæ in Imperio legis antiquitatem colligo ex Witikindo  
Saxone, qui de Othone I. Imp. sic loquitur: *De legum quoque varie-* Lib. 2.  
*tate facta est contentio: fuerêque qui dicerent, quia filij filiorum non de-*  
*berent computari inter liberos, hereditatemque legitimè cum filijs sortiri, si*  
*fortè patres eorum obijissent auis superstitibus. Vnde exijt edictum à Rege,*  
*vt vniuersalis populi conuentio fieret apud Willam, que dicitur Stela.*  
*Factum est, vt causa inter arbitros iudicaretur debere examinari. Rex*  
*autem meliori consilio usus, noluit nobiles viros ac senes populi inhonestè*  
*tractari; sed magis rem inter gladiatores discerni iussit. Vicit igitur pars,*  
*qui filios filiorum computabant inter filios; & firmatum est, vt aquali-*  
*ter cum patris hereditatem diuiderent pacto sempiterno. Eadem, sed*  

A 2breuius,

# LOTHARINGIA

4

Ad an.  
942.

breuius, sic refert Sigebertus : *Orta dissensione inter Principes de varietate legis, utrum deberent auiis superstitibus filij filiorum post patres defunctos hereditare, an exheredatis fratrue libus deberet hereditas ad patruos redire; ex Regis OTHONIS, omniumque Principum sententia, cognitio veritatis commissa est gladiatorio iudicio: cessitque victoria his, qui censebant fratrum filios debere cum patribus hereditare.*

In illâ autem quæstione tempore Othonis primi Imp. agitatâ feminarum nulla mentio; quippe quæ ab omni patrum Feudali hereditate arcerentur, quemadmodum sexcenta ultra Rhenum exempla docent. Citra Rhenum pauca hæc obseruau.

Bruingus  
in Histor.  
ms. Lu-  
xemb.

Primum est ERMENSINDÆ, HENRICI CÆCI Comitis Namurcensis & Luxemburgensis filia, quæ post patris excessum anno M. C. XCIII. ab HENRICO VI. Imp. priuata est utroque Comitatu: contulit enim Namurcum Cæsar BALDVINO Hannoniæ Principi; Luxemburgum verò OTHONI Burgundiæ Comiti, à quo Ermensinda illud redemit, & in Henricum, ex Valeramo Limburgensi marito filium, transmisit.

Gerbrandus.  
Snoius.

Alterum est ADÆ, THEODORICI VII. Hollandiæ Comitis filia, quâ exclusâ, WILLELMVS, Theodorici frater, in Hollandiæ Principatu successit anno M. CC. III.

Lib. 4. in  
Proleg.

Tertium exemplum, de Lotharingiæ Inferioris Ducatu, sic expressit Dinterus : *Mortuo OTHONE Duce sine liberis, qui patri suo [Carolo] successerat in Ducatu Lotharingiæ, QVIA MARES HEREDES NON HABVIT, Ducatus eius per HENRICVM huius nominis Imperatorem II. & Regem Romanorum, datur Godefrido Comiti Viridunensi; filio Godefridi Comitis Ardennensis, anno M. VI. Assentitur Auctor Magni Chronici Belgici hisce verbis : Mortuo Othone sine herede,*

Pag. 90.

De Regno  
Burgund.  
pag. 177.

GERBERGA soror eius, QVIA FEMINA FVIT, Ducatum Lotharingiæ amisit. Item Alphonfus Delbene de Othonis sororibus, Gerbergâ & Ermengarde : *Hæ hereditatis iure Lotharingiam ad se pertinere prædicabant, & in possessionem eius ingredi conata sunt : sed Godefridus Barbatus, filius Godefridi Arduanorum, Bulloni & Viridunensium Comitum, eas prohibuit, & vi & armis Lotharingiam occupauit anno sexto supra millesimum. Dicebat enim se ab HENRICO Imp. Ducem fuisse constitutum; FEVDVM LOTHARINGIÆ ad masculos, non ad feminas pertinere. Meyerus denique de iisdem sororibus : His spretis feminis, HENRICVS Cæsar (is qui in calum dicitur relatus) cum in eam Prouinciâ summum haberet iudicium, GODEFRIDO, Ducis Arduennæ; Godefridi filio, Lotharingiam dedit, assignato Gerberga, Lamberto nuptæ, Loniensium tantummodo Comitatu.*

Lib. 2. Annual.

Quartum



# M A S C V L I N A.

Quartum exemplum de Lotharingæ Superioris Ducatu (de quo iam quæstio est) opportunè subministrat Sigebertus ad annum M. XXXIV: FRIDERICO *Mosellanorum Duce mortuo*, QVIA In Chron. MARES FILIOS NON HABEBAT, QVIBVS DVCATVS COMPETET, *Gothelo Dux*, impetrato etiam ab IMPERATORE *Mosellanorum Ducatu*, in Lotharingiâ potentius principatur. Albericus, Dinterus, Ægidius de Roya, & alij non pauci, eadem Sigeberti verba integrè retulerunt: solus Theodorus Gothofredus in Genealogijs Lotharingæ & Portugalliæ, quas prælo. subiecit anno M. DC. XXIV. verba Sigeberti, quæ maiusculo expressimus caractere, scienter prætermisit; eodemque modo mutilavit Magnum Chronicum Belgicum, in quo hæc leguntur: *Frederico Mosellanorum Duce mortuo*, QVIA Pag. 101. MARES FILIOS NON HABVIT, QVIBVS DVCATVS COMPETET, *Gothelo Dux Lotharingæ Inferioris*, impetrato ab Imperatore CONRADO *Mosellanorum etiam Ducatu*, in Regno Lotharingiæ potentius principatur. Omisit studiosè Gothofredus verba eadem, quæ in Sigeberto prætermiserat, quæ Ducatum Lotharingæ Superioris, siue Mosellanorum, solis maribus competere palàm insinuant.

Quintum exemplum, extra Lotharingiam, in Regno Burgundiæ, præbet Sabaudia Comitatus; de quo sic Renatus Choppinus: *Allobrogum Comitatus filias minimè dominari, masculo è Sebusianis Regulis extante, decreuerunt litis disceptatores ex lege Salicâ* (alij dicunt ex Vocationiâ) secundum Petrum Allobrogem aduersus Constantiam, neptem ex fratre maiori natu, uxorem Comitûs *Cablonensis*, anno M. CC. LVI. Addit deinde Choppinus: *Sabaudia planè VIRILE est SACRI IMPERII BENEFICIUM*, Beraldo Saxoni in primis concessum ab Othone I. Germaniæ Cæsare patruo. A Sigismundo postmodum Imperatore Comitatus Sabaudia Ducatus titulo & prærogatiuâ auctus est Constantiæ, anno M. CD. XV.

Planum est igitur quod ait Albericus, *non solere feminas in Imperio hereditare*: quod equidem statutum Imperialibus rescriptis vim habere in Feuda per Imperium, quæ beneficiario iure à Principibus obtinentur, norunt Iurisconsulti. Id tamen de iure communi est intelligendum: possunt enim feminæ ex Imperatoris gratiâ & priuilegio Feudorum possessionem nancisci. Ita Fridericus I. Imperator diplomate dato Ratisponæ anno M. C. LVI. HENRICO Austriæ primo Duci indulgit, *ut eius FILII & FILIÆ indifferenter possent Ducatum Austriæ hereditario iure à Regno tenere & possidere*.

Adolphus item Cæsar anno M. CC. XCV. Rainaldo Comiti Gel-dria concessit, casu quo sine prole masculâ ab hac luce migraret, *ut filiarum eius*

Lib. 3. de Dom. tit. 6. num. 60.

Ad an. 1113.

Chronica Augst. Cuspini-nus in Au-  
striâ.  
Ex Archi-  
uo Na-  
murc.

*eius maior natu ei succederet in Comitatu, & in alijs Feudis ab Imperio dependentibus.*

Dinterus  
& But-  
kens pas-  
sim.

Dinterus  
lib. 6. cap.  
116. ¶

Philippus denique; Albertus, Henricus VII. & Carolus IV. Imperatores Ducibus Lotharingæ Inferioris & Brabantiae indulserunt, *ut si masculum heredem non haberent, eorum FILIAE in Feudis liberè & tamquam masculi succederent.* Et idcirco dum Constantiae anno M. CD. XIV. SIGISMUNDVS Imp. obijci fecisset GOSWINO, Priori Carthusiensium de Soelhem, ANTONII Brabantiae Ducis Legato, quod Imperio ius esset acquisitum in Ducatu Brabantiae, & quod femina non possent in eo succedere: cordatè respondit benè informatus Prior, quod Duces Brabantiae de successione filiarum sunt ab antiquo privilegiati à Divis Imperatoribus & Regibus Romanorum.

Quotiescumque ergo legitur, Feudum aliquod Imperiale à femina possessum, illico intelligendum est id factum ex speciali Caesaris gratia, & præter ius commune Imperij.

Atqui Lotharingæ Superioris Duces privilegium eiusmodi neque obtinuerunt, neque obtenderunt umquam, legi suæ Salicæ antiquissimæ, & iuri ordinario Imperij, quo à Feudis militaribus feminæ regulariter excluduntur, semper obstricti.

## C A P V T I I.

*Prius Anonymi argumentum ab Idâ desumptum, contra Lotharingia masculinitatem, dissolvitur.*

**P**RODIIT anno M. DC. XL. scriptum Anonymi cuiusdam Parisiensis, qui ut probaret Lotharingæ Superioris Ducatum ad feminas devolui, exemplis ferè causam suam egit, sed præter historicam fidem prolatis: ita ut mihi commenta verius quam argumenta refellenda sint. At cuius ea generis? Primum est IDAE, Eustachij II. Comitis Bononiensis vxoris; quæ (inquit) fratri suo Godefrido Gibboso Duci Lotharingæ absque liberis defuncto sine contradictione aut oppositione successit. Quod absolute falsum est: interfecto enim à sicarijs Godefrido Gibbere, Henricus IV. Imp. de Feudis eius primarijs sic disposuit, teste Lamberto Schafnaburgensi: Rex Pascha Traiecti celebrauit; ibique Ducatum Lotharingæ filio suo CONRADO; Marchiam verò, quæ dicitur Antverpa, GODEFRIDO (Bullionio, Idæ filio) Eustachij Comitis filio, impigro, & ad rem militarem acerrimo adolescenti tradidit. Eadem quoque habet Sigebertus in ms. Ortiliano. Ex quibus perspicuum est, Idam in Ducatu Lotharingæ Inferioris Godefrido Gibboso

Ad an.  
1076.

Gibboso fratri haud successisse; & consequenter Godefridum Bullonium, Idæ filium, à matre Ducatum illum non accepisse; sed ab Henrico IV. Imp. anno dumtaxat M. LXXXIX. testibus Sigeberto & Alberico hisce verbis: GODEFRIDO, GODEFRIDI GIBBOSI *ex sorore nepoti, tandem DATVR Ducatus Lotharingie.*

Ad an.  
1089.

Verum quidem est, Godefridum Bullonium, Idæ filium, à Godefrido Gibbo, Idæ fratre, heredem fuisse scriptum; quippe qui charitam anni M. XCIV. sic exorditur: Ego GODEFRIDVS, *legitimus successor & HERES Ducis Godefridi Barbat; filijque eius potentissimi & iustissimi Ducis Godefridi, auunculi mei, &c.* Sed hereditas illa non alia fuit quàm allodiorum, quæ tam in Superiori quàm Inferiori Lotharingiâ maiores eius possederant; puta Bullionij, Bascij, Genapiæ, Sathanaci, & Mosaci; non autem Feudorum, quæ Imperio erant obnoxia: ynde Albericus clarè ad annum M. LXXVI. *Godefridus iuuenis, frater Balduini & Eustacij; per matrem suam Idam factus est heres Bullonij; quia nempe Ida eius mater soror erat Godefridi Gibberis, Bullionij Dynastæ.* Perspicuè in hunc locum vetus Genealogia de Idæ filiis: *Hi dicti fuerunt de Bullion, quia adepti sunt Principatum de Bullion post mortem auunculi sui Godefridi Gibbosi.* Et quidem Bullonium fuisse allodium, non Feudum, clarè docet Chronicum M. S. Monasterij S. Huberti in Arduennâ: *Dux Lotharingie GOZELO. castrum Bullonij in propriam tenebat allodium, & Comitatum Virdunensem.* De Sathanaco & Mosaco hæc reperi monumenta in Chartulario Gorziensi.

Miræus  
Don. piar.  
c. 67.

In Chron.

Ex ms.  
Niuellen-  
si.

*Charta Godefridi Ducis Magni, seu Barbat.*

✠ **I**N NOMINE sanctæ & indiuiduæ Trinitatis. GODEFRIDVS Dei gratiâ Dux & Marchio, &c. Instinctu & supplicatione venerandæ collatæ nostræ BEATRICIS multoties sollicitatus, considerans quod Ecclesiam S. Dagoberti apud SATHANACVM, VILLAM IVRIS NOSTRI, & pretiosis ipsius S. Martyris ossibus & multis alijs Sanctorum pignoribus illustratam; sed à Canonicis imbi carnali vitâ degentibus, & suâ potiùs quàm diuina querentibus, usquequaque neglectam; virum boni testimonij, & sanctæ conuersationis, HENRICVM Gorziensem Abbatem, & Monachos eius, cum consilio Domini EVRARDI, sanctæ Trëuironum Sedis Archiepiscopi, in cuius Diocesi locus ipse situs erat, ceterorumque fidelium Dei, ac nostrorum, conuocauimus; & illis remotis, istos in eorum locum substituiimus, &c. ✠ GODEFRIDI Ducis. Signum BEATRICIS coniugis suæ. Signum GODEFRIDI filij

Pag. 184.



filij sui consentientis. Signum Hezelini Comitiss. Signum Fulconis Comitiss. Signum Herbranni Castellani, &c. Actum Bullioni anno Dominica Incarnationis M. LXIX. indict. VII. regnante HENRICO, filio gloriosi Imperatoris Henrici, anno Regni eius XIII.

*Charta Godefridi Ducis, cognomento Bullionij, Godefridi Magni ex Idâ filiâ nepotis.*

Pag. 186.

✠ **I**N NOMINE sanctæ & individue Trinitatis, Patris & Filij & Spiritus sancti. GODEFRIDVS Diuinâ propitiante gratiâ Dux & Marchio, &c. Notum esse volumus Sanctæ & vniuersalis Ecclesiæ filijs fidelibus, tam futuris quam presentibus; quia dux GODEFRIDVS avus meus, cum BEATRICE uxore suâ, apud SATHANACVM, IVRIS XVI VILLAM, in Ecclesiâ S. Martyris Dagoberti pro suarum animarum remedio Monachos de Monasterio S. Gorgonij constituerunt; eisque inter alia, pro supplemento victus & vestitus, Ecclesiâ villæ MOSACI, quæ sine contradictione SVÆ PROPRIETATIS erat, legaliter condonaverunt: quam etiam ipsi Monachi totâ vitâ ipsius AVI MEI, & filij sui AVNCVLI MEI, quietè & pacificè possederunt, &c. ✠ GODEFRIDI Dei gratiâ Ducis & Marchionis. Acta Bullioni anno Domin. Incarnat. M. XCIII. Indict. V. anno Regni HENRICI quarti XXXVII. Imperij X. pontificante Domino FILBERTO Treuironum Archiepiscopo, anno sui Pontificatus X.

Ex chart.  
Affligem.

Quin & ipsâ etiam IDÂ, quam adducit Anonymus; in Affligemensi membranâ sic loquitur: EGO IDA BOLONIENSIS COMITISSA, humilis Christi ancilla, cunctis in fide manentibus gaudia promereri promissa fidelibus. Notum facio tam presentibus quam futuris signum meæ dilectionis erga Dominos meos & Fratres, videlicet Monachos novi Monasterij, cui vocabulum AFFLINGEN inditum erat ab antiquis, &c. Igitur in ALLODIO MEO & villâ, quæ vocatur GENAPIA, pro salute animæ meæ, patris quoque mei Ducis GODEFRIDI, & Comitiss EVSTATHII Domini mei, Ecclesiâ cum decimis, & vniuersis eius redditibus, firmiter perpetuòque iure tenendam dedi supradictis Fratribus; in idipsum filijs meis, GODEFRIDO, EVSTATHIO & BALDVINO, cooperantibus. Filius quoque meus Dux GODEFRIDVS in eadem villâ Genapiâ quinque mansos terre donavit iisdem Fratribus, &c. Factum est autem hoc Incarnationis Dominicæ anno M. XCVI. indict. IV.

Vides igitur, Anonyme, IDAM, & Godefridum Bullionium eius filium, allodiorum ex hereditate possessores, non Feudorum.

Vides



## M A S C V L I N A.

9

Vides *Idam* iam inde ab obitu patris & fratris dici dumtaxat *Bolonia Comitissam*, non *Lotharingæ Ducissam*: cuius *Idæ* frater *Godefridus Gibbosus* & filius *Bullionius* non fuerunt *Duces Lotharingæ Superioris* (quam obtinuit *Theodoricus Dux*, cognomento *Strenuus*, ab anno *M. LXX.* vsque ad *M. C. XV.*) sed *Inferioris*; neque hereditatis iure, verum Imperatoris beneficio; ille anno *M. LXX.* iste anno *M. LXXXIX.* unde sequitur, argumentum ab *Idâ* desumptum, pro *feminarum iure* ad *Lotharingiam Superiorem*, futile omnino & absurdum esse; adeoque consuetudinem, ab exemplo *Idæ*, à te inaniter iactatam.

Testimonium denique *Nobilium*, quod adducis, coram *Theobaldo Duce* exhibitum anno *M. CCCVI.* vel dicis causâ confictum fuit; vel illi testes *Historiarum* haud erant gnari: quandoquidem ex antiquioribus & indubitatis monumentis constat, *Beatricem* & *Sophiam*, *Friderici II. Mosellanorum Ducis* filias, post mortem patris à Ducatu fuisse exclusas anno *M. XXXIV.* Neque vlla femina ante *Isabellam* (de quâ mox agemus) in *Superiorem Lotharingiam* ius vllum palam obtendit.

## C A P V T I I I.

*Respondetur alteri Anonymi argumento, de Isabellâ  
Caroli primi Ducis filiâ.*

**S**OLVTO & enervato priore *Anonymi* argumento, transimus ad alterum. Affirmat ille, *ISABELLAM*, *Caroli I. Ducis* filiam, *Renati Ducis Andegauensis* coniugem, post patris obitum fuisse optimo iure *Lotharingæ Ducissam*: cuius quæstionis nodus ut facilius extricetur, expedit subiectam hâc tabellam sedulò inspicere & examinare.

B

I. IOAN-

## LOTHARINGIA

## 1. IOANNES Dux Lotharingæ.

2. CAROLVS I. Dux  
Lotharingæ.2. FRIDERICVS Comes  
Guifæ & Vaudanimontis.3. ISABELLA vxor Rena-  
ti Andeg. Ducis Lotharingæ  
intrusi.3. ANTONIVS I. Comes Vau-  
danimontis, Dux Lotharingæ le-  
gitimus.4. IOANNES  
Dux Calabria.4. IOLANDA vxor  
Friderici VI. Ducis  
Lotharingæ.4. FRIDERICVS VI. Dux  
Lotharingæ: vxor Iolanda An-  
degauentis.5. NICOLAVS Dux  
Calabria, ἀναγ.5. RENATVS Dux Lothar.  
& Barri.6. ANTONIVS II. Dux  
Lothar. & Barri: à quo ce-  
teri Duces & Principes na-  
tu maiores.6. CLAVDIVS  
Dux Guifæ: à quo  
Principes natu mi-  
nores.In Stem-  
mate Du-  
cum Lo-  
thar.In Histo-  
r. Prouinciæ.L. 7. fol.  
482. a.Tomo 2.  
l. 11.

Dubitat Antonius Albizius, num Fridericus, Comes Guifæ & Vaudanimontis, frater Caroli I. Ducis, proles masculas habuerit: *Quia si habuisset, inquit, ad Renatum Andegauensem per uxorem Lotharingia iure hereditario non peruenisset.* Reuerà tamen Fridericus filium habuit Antonium, qui pro iure suo in Lotharingiam contra Renatum Andegauensem acriter decertauit. Dum enim iste defuncto socero Ducatus possessionem adire veller, Antonius acerbè illum prohibuit, affirmans ditionem Lotharingicam non posse in eum traduci. Hæc Cæsar Nostradamus: quibus haud absimilia refert Richardus Wasseburgius iure Imperij adducto: *Exinde, inquit, ANTONIVS Vaudemontanus, filius FRIDERICI LOTHARINGI, fratris defuncti CAROLI, decreuit iure successionis contendere ad obtinendum Ducatum Lotharingie, affirmans ISABELLAM Renati uxorem non posse patri succedere in Ducatu, de quo femine non poterant hereditare superstiti masculo legitimo, qualis ipse erat, Caroli defuncti ex fratre nepos, qui præferebat NOMEN & ARMA Lotharingie; & proinde filiam à se debere excludi iuxta IMPERII IVRA & consuetudines Ducatum Principatumque.* In eundem sensum Girardus Hallianus tradit, ANTONIVM Lotharingum, Comitum Vaudanimontis, tunc obiectissè, Ducatum Lotharingie sibi competere, utpote FEVDVM IMPERII, quod in eum non delabitur; ISABELLAM Renato iunctam ab se debere excludi.

Illud verò dissidium cò vsque processit, ut ad arma ventum fuerit. Antonius enim anno M. CD. XXXI. ad bellum se comparauit, suafque

suasque copias iunxit Philippo Bono Burgundiæ Duci aduersus Renatum hereditatis suæ usurpatorem. Certatum est vtrimque acriter secundâ die Iunij ad Bulnevillam, vbi Renatus victus, captusque Diuisionem deductus est. *Mira res, & apud posteros caritura fide* (inquit de pugnâ illâ Pius PP. II.) *quinque hominum millia octo & triginta milia fuderunt: tantum in bello Dei potestas conspicitur.* Lib. 9. Comm.

Franciscus Haræus affirmat Antonium illo prælio victorem recepturasse Ducatum Lotharingiæ, quem Renatus inuaserat: *Armis, ait, & ope Burgundi, cum Ducatum obtinuit, contra Renatum generum Caroli.* Et certè Comes Antonius exinde scutum Lothariensè putum prætulit, absque fracturâ siue. distinctione, tamquam legitimus Lotharingiæ Dux & Dominus. Contrâ, Renatus tunc bello victus, non Dux Lotharingiæ, sed *Dux Barrensis* dumtaxat nuicipatus est à Biturige, Caroli VII. Franciæ Regis Feciali. Necnon Turris ipsa, in quâ Diuisionem captiuus detinebatur, ab eo tempore semper dicta est *Turris Barrensis*: & Sacellum, quod in vrbe illâ dotauit in honorem S. Andreæ Apostoli, non aliter audit quàm *Capella Barrensis* nomine. Quæ maximè conuincunt Renatum stirpe Francum, ab ipsis Francis pro Duce Lotharingiæ legitimo non fuisse agnitum. In Hist. Car. VII. Regis.

Enguerrannus Monstreletus de pugnâ ad Bulnevillam commissâ rem adfert memoriâ in primis dignam: *Comes Vaudemontanus, inquit, pumiloni insidens equo mediam aciem perequitabat, adstantes amicè commonesaciens, ut confidenter & animosè depugnarent, affirmans sub suæ damnationis periculo, actionem suam iustam esse; Ducem Barrivelle ipsum iniuste exhereditare. Quæ profectò verba eius firmando iuri erant petoportuna.* Anno 1431.

Obijcit Anonymus, terminatam fuisse litem latâ sententiâ in fauorem Renati aduersus Antonium: sed Auctores, quos adducit, de causæ Iudiciis non conueniunt; dicunt enim nonnulli fuisse Concilij Basileensis Patres; alij Sigismundum Imperatorem, qui Concilio illi vnâ cum Principibus Imperij intererat.

Quod attinet ad Concilij Patres, supponit Belleforestius, illos de Lothariensi lite dijudicasse in Renati fauorem, sed ad causæ cognitionem haud plenè instructos fuisse, ad id solummodò attendentes, quod filia patri proximior esset quàm frater aut nepos patris; atque ita Renati uxorem, Caroli Ducis filiam, iure potiori debere patri succedere, quàm Caroli fratrem aut nepotem: haud etiam perpendentes, Ducatum Lotharingiæ SALICVM esse, & ad Vaudemontanum Principem attinere. Tomo 2. lib. 5. c. 95.

Verùm Patres Concilij iudicium tulisse in fauorem Renati, nullo modo quadrat cum ijs quæ narrantur à Wasseburgio, scilicet, *Re-* Lib. 3. fol. 489. b. flores



Tomo 3.  
Constit.  
Imper.

*Flores ciuitatis Viridunensis ab eo Concilio Sacrorum interdictione mulctatos anno M. CD. XXXVIII. prouocasse ad Eugenium Papam, vel ad Ferrariense Concilium; adducentes (inter alia) declarationem fuisse factam à RENATO Sicilia Rege, quod ipse nollet obtemperare Basileensi Concilio, sed Ferrariensi; claro indicio, Basileensem Synodum de Lotharingensi causâ in Renati fauorem nihil decreuisse. Et verò si quidpiam gratiosè sanxisset, id omne pro irritò fuisset habitum edicto ipsius Sigismundi Cæsaris aduersus Patres publicato Vlnæ in Comitibus anni M. CD. XXXIV. die XXVIII. mensis Iulij, de incompetentiâ Concilij Basileensis in iudicandis causis Principum Imperij ad Sacram Cameram pertinentibus. Sed reuerà Synodus Basileensis de lite Lotharingicâ nihil decreuit; in cuius Actis diurnis (quæ manu scripta extant quatuor Voluminibus) nulla Lotharingæ mentio.*

Lib. 1.  
Reipub.  
c. 9.

Iam quod attinet ad Sigismundum Cæsarem, delirat Ioannes Bodinus, dum Archidiaconum Viridunensem (qui est Richardus Wasseburgius) scribentem adducit; in Concilio Constantiensi Fridericum Comitem Waudanimontis sustinuisse, Lotharingiam esse Feudum Imperiale solis masculis debitum, illumque Sigismundi Imp. fauore vicisse in causâ contra Renatum Andegauensem. Delirat inquam Bodinus, & imponit Wasseburgio; quia Concilium Constantiense inchoatum est anno M. CD. XIV. finitum anno M. CD. XVIII. quo tempore superstes erat Carolus I. Dux Lotharingæ ad annum usque M. CD. XXX. à cuius obitu dumtaxat cœpit lis de successione Ducatus inter Renatum eius generum, & Antonium Vaudemontanum (non Fridericum) eius ex fratre nepotem. Narrat autem Wasseburgius, iudicium litis inter ANTONIUM & RENATUM fuisse delatum ad Imperatorem Basileæ existentem; quia dissidentes habebant rationem, quod Cæsares Ducatum Lotharingæ censerent inter partes & membra Imperij; essentque in possessione, ut Duces Imperium recognoscerent pro vijs maximè publicis, prolibus adulterinis, & eiusdem Ducatus Regalibus: id quod ab obitu Caroli I. Ducis nondum fuerat factum. Nonnullis deinde interiectis pergit; à Sigismundo Imperatore inuestitum fuisse Renatum de Regalibus Ducatus Lotharingæ causâ Isabellâ uxoris suæ; idque probat litteris Guillelmi Chaney, Canonici Viridunensis, datis Basileæ XXVII. Aprilis anni M. CD. XXXIV. ad Viridunense Capitulum

Lib. 7.  
folio 482.  
b.

istis ipsismet verbis: Dominus noster metuentissimus, Dominus Dux Barrensis, fuit honorificè per Dominum Imperatorem in Regalibus Ducatus Lotharingæ, non obstante Domino Comite Vaudanimontis, receptus. Canonici Viridunensis scriptioni consentit testis maior, Pius II. Papa, vbi

Folio 483.  
a.

Lib. 9.  
Comm.

vbi de Lotharingiâ: *Huic, nostrâ etate*, inquit, *RENATVS præsuit, Dux Gentis ab Imperio constitutus.*

Verum enim verò Renatum de Lotharingiæ Ducatu non fuisse plenè inuestitum, sed absque dubio cum restringente clausulâ, *saluo iure tertij* (cuius frequens vsus in diplomatis, quibus gratia conceditur, in cuius executione ex leui controuersia moræ intercessio oriri potest) conuincunt quæ sequuntur rationes.

In primis, quia Ducatus Lotharingiæ, cum esset Imperialis, ad feminam plenè transmitti non poterat nisi ex priuilegio, quod tunc locum non habebat, cum agebatur de iure tertij, qui natalium & Imperij iure nixus, lite contendebat aduersus mulierem. Ad priorem enim & antiquiorem inuestituram semper est recurrendum; *que* (inquit Baldus) *est vetus basis & fundamentum, adeoque radix ceterarum.* Atqui prima Friderici I. Ducis inuestitura feminas excludebat. Constat enim, Friderico II. Duce, primi nepote ex Filio Theoderico, sine liberis masculis defuncto, Conradum II. Imp. Gotheloni Magno Ducatum contulisse.

Ex inuestiturâ igitur, cum interpositâ conditione, Renati possessio non potuit esse valida; qui propterea durante dissidio Cæsareum diploma numquam in publicum emisit, nec ullibi terrarum postea visum aut editum est; nec fortè scripto vmquam consignatum, & sigillo munitum.

Præterea Renatum non fuisse plenè inuestitum, euident est ex eo, quod ante publicationem Pacis Atrebatensis anno M. CD. XXXV. solemnî ritu & pompâ fuit pronuntiatum, *Renatum Ducem Andegauensem & Barrensem* (non Lotharingiæ Ducem) *nullatenus in tractatu Pacis debere comprehendî, sed ut prius manere in vinculis, & in potestate Philippi Burgundiæ Ducis.* Ecce auctoritatem in Atrebatensi templo S. Vedasti propalatam.

IN NOMINE Domini, Amen. Tenore presentis publici instrumenti cunctis pateat euidenter, & sit notum, quod anno à natiuitate eiusdem M. cccc. xxxv. indictione xiv. die verò Mercurij xxi. mensis Septembris, Pontificatus Sanctissimi in Christo Patris ac Domini nostri, Domini EVGENII diuinâ providentiâ Papæ quarti anno quinto, sacro Basileensi Concilio vigente, Illustrissimis ac Illustribus Principibus ac Dominis, Dominis PHILIPPO Burgundiæ, Brabantie, &c. Duce ex una; nec non KAROLO Duce Borbonij, ARTURO Richemondie, Constabulario Franciæ, L. VVyndomiensi, Comitibus, ac Reuerendo Patre, Patre Domino Reginaldo Remensi Archiepiscopo, Cancellario Franciæ, Nuntijs & Ambassiatoribus Serenissimi ac Christianissimi Principis, Domini KAROLI Francorum Re-

Ex Actis  
MSS. Conci.  
Basil.

gis in choro Ecclesie seu Monasterij Sancti Vedasti Atrebatensis, Ordinis  
 S. Benedicti, pro Missa de Sancto Spiritu audiendâ, deinde tractatu Pacis  
 inter præfatum Dominum Karolum Regem, & eundem Dominum Ducem  
 Burgundie, inito publicando, & iuramentis ad hoc per partes hinc inde  
 præstandis, videlicet iuxta oratorium præfati Domini Ducis Burgundie,  
 ad dextrum latus chori ipsius Ecclesie positum & aptatum, constitutis &  
 congregatis partibus ex alterâ. In nostrum Notariorum publicorum, &  
 Dominorum testium ad hac vocatorum & rogatorum præsentia; ipse Illu-  
 strissimus Princeps Dominus Dux Burgundie coram præfatis Dominis,  
 Duce Borbonij, Richemondia & Windomienfi, Comitibus, ac Domino Ar-  
 chiepiscopo Remensi, Cancellario Francie, Ambasiatoribus præfatis, ibidem,  
 ut præfertur, constitutis, per organum nobilis ac strenui militis, Domini  
 Nic. Raulini, Cancellarij præfati Illustrissimi Domini Ducis Burgundie,  
 dixit, & expressè protestatus fuit, quod non intendit, nec sue intentionis  
 fuit, aut est, Illustrẽm Principem Dominum RENATVM, DVCEM AN-  
 DEGAVENSEM ET BARRENSEM, suum nunc prisionarium, nullatenus  
 in dicto tractatu Pacis, ut præfertur, inter præfatum Dominum Regem  
 KAROLVM, & eundem Dominum Ducem Burgundie inito, ac de proxi-  
 mo firmando & publicando, debere comprehendì, nec per eundem Domi-  
 num Ducem Burgundie de manibus eiusdem Domini Ducis fore liberatum;  
 sed ipsũ Dominum DVCEM ANDEGAVENSEM ET BARRENSEM  
 in statu quo erat ante dictũ tractatum debere remanere. Quã quidem  
 protestatione, sic ut præfertur, per Illustrissimum Principem Dominum  
 Ducem Burgundie per organum eius suprà factã; præfati Domini, Dux  
 Borbonij, & Comites Richemondia & Windomienfis, ac Dominus Ar-  
 chiepiscopus Remensis, Cancellarius Francie, Ambasiatores, & alij Domini  
 eorum college in hac parte, imbi præsentis nomine Ambasiatorio quo suprà,  
 per organum eorundem Dominorum Ducis Borbonij & Archiepiscopi re-  
 sponderunt, & quilibet eorum respondit, quod eo modo quo præfatus Illu-  
 strissimus Princeps Dominus Dux Burgundie, factũ concernens dictũ  
 Dominum DVCEM ANDEGAVENSEM ET BARRENSEM; intellige-  
 bat, etiam ipsi Ambasiatores præfati Domini KAROLI Francorum Regis  
 eo modo intelligebant, & eorum quilibet intelligebat, videlicet eundem  
 Dominum DVCEM ANDEGAVENSEM & BARRENSEM non debere  
 in huiusmodi tractatu Pacis comprehendì, seu includi, nec de manibus pote-  
 stateque eiusdem Domini Ducis Burgundie liberatum fore. De quibus om-  
 nibus & singulis præmissis prælibatus Illustrissimus Princeps Dominus  
 Burgundie, Brabantie, &c. Dux nomine suo privato petijt à nobis Notarijs  
 publicis, sibi & omnibus quorum interest fieri atque tradi unum & plu-  
 ra, publicum & publica, instrumentum & instrumenta. Acta fuerunt hac  
 Atre-



*Atrebat in prædicto Monasterio S. Vedasti sub anno, indictione, die, mensē, Pontificatu, & loco, quibus supra; præsentibus ibidem Venerabilibus ac circumspèctis viris, Dominis & Magistris, Ioanne Caprioli, Archidiacono de Venguesin in Ecclesiâ Rothomagensi; Quintino Menardi, Præposito S. Audomari Morinensis Diœcesis; Nobili viro Ioanne de Brimen, Scutifero, Domino de Humbercourt; & Philippo Mangart, Licentiatu in Legibus, Atrebatensis Diœcesis, testibus ad præmissa vocatis, & specialiter rogatis.*

Aduerte, Lector, in illis solemnibus tabulis anni M. CD. xxxv. Renatum titulo Ducis Andegauensis & Barrensis dumtaxat cohonestari: qui si præcedenti anno M. CD. xxxiv. de Regalibus Ducatus Lotharingiæ legitimè & plenè fuisset inuestitus per Imperatorem; vtique Legati Caroli VII. Regis Franciæ, qui præsentibus aderant, non tulissent appellationem Ducis Lotharingiæ prætermitti in Francicæ stirpis Principe, cuius soror MARIA ipsius Caroli VII. Regis vxor erat.

Tertiò, inuestitura illa talis qualis à Sigismundo Imp. præter ius & rationem decreta est ex odio quod habebat aduersus Philippum Burgundiæ Ducem, Antonij Vaudemontani fœderatū ac defensorē: quam quidem acerbiter dissimulare non potuit in publico Basileensi confesso die Sabbati VIII. Maij, anni M. CD. xxxiv. vbi Patribus in templo Prædicatorum congregatis, nunciāns abitum suum, dixit *multa de Domino Duce Burgundiæ; & specialiter, quòd nimis altè volebat volare, dando versiculum:*

Ex Actis  
Concilij.

*O fili chare noli nimis altè volare.*

Equidem pro indubitato illius simultatis testimonio refert Dintenus, sequenti Iunio Sigismundum Vlmæ cum Legatis Regis Franciæ fœdus pepigisse contra Philippum Ducem Burgundiæ, ad quem prouocatorios misit codicillos; & è contrario Philippum ad Principes Imperij circulares dedisse epistolas, quibus de Imperatore conquerebatur, quòd sibi bellum iniuste nunciaret; *quadam de dominijs nostris* (aiebat Dux Philippus) *in inferioribus partibus Allemannie Imperio fore deuoluta prætendens, vt aliàs declarauit ipsa dominia mortua manus affecta seruituti; & cum ad ea non succedant femina, in masculorum succedentium defectu deuolutionem nouiter sibi locum vindicare.* Ex quibus nullo modo elucet, quomodo stare possit, Sigismundum mense Aprilii anni M. CD. xxxiv. Renato, vt Isabellæ marito, dedisse plenam & absolutam Feudi Lotharingici Imperialis, ac proinde masculini inuestituram; eundemque Cæsarem subsequenti statim mense Iunio obtendisse deuolutionem dominiorum Ducis Burgundiæ, quæ ex Imperij lege transcribi ad feminas non posse contendebar.

Lib. 3.  
c. 243. &  
seq.

Manebat

In Hist.  
ms. Ducis  
Philippi.

Manebat igitur adhuc in vinculis Renatus, non plenè inuestitus, anno M. CD. XXXV. pro causâ Lotharingicâ; & verò etiam sequenti M. CD. XXXVI. quo Dux Burgundiæ Philippus verè Bonus, ad procurandam Lothariensibus Pacem, proposuit coniugium IOLANDÆ, Renati & Isabellæ filix, cum FRIDERICO Antonij filio: qui Dux Philippus deinde, acceptâ Renati fide, conceptisque de futuro sponfalibus, anno M. CD. XXXVII. Renatum idcirco soluit, ut Neapolim proficisci posset, sub conditione tamen, ut utrumque filium suum datæ fidei obsidem traderet; quod ab æquali Scriptore Georgio Castellano reperi annotatum hisce verbis: *LYDOVICVS Rex Sicilia, RENATI & CAROLI Andegavorum frater, ob præclarè gestarum cognitum in Franciâ, satis potenter regnavit Neapoli iuxta genium regionis: sed non diu duravit eius Regnum, etate mediâ morte præventi. Illi autem succedere debebat RENATVS DVX BARRENSIS, qui victus in prælio contra Burgundiones, captivus Divionem abductus est: quo impedimento, & ob dilatam eius liberationem, multum retardatus est in adipiscendâ Regni possessione; unde adversus detentorem animo semper tumens fuit: FILIOS tamen suos obsides dedit, & profectus est Neapolim; ubi favorem simul & contradictionem invenit. Aduerte iterum, Lector, RENATVM à Castellano, tunc viuentem, DVCEM BARRI dumtaxat nuncupatum, non etiam LOTHARINGIAE.*

Wasseb.  
lib. 7. folio  
491. a.

Lib. 17.  
an. 1440.

Tempus interea promissi per Renatum connubij sensim dilabebatur. Antonius Friderici parens æquo satis animo moram sustinuit usque ad annum M. CD. XL. quo Iolandâ iam duodecenni, ac nubili, Renatus agens Neapoli nuptias procrastinabat: ex quo indignatus Antonius (qui de cognationis lege solutionem à Pontifice obtinuerat per Guillelmum Filatre, Abbatem S. Theodoricæ Remensis) denuò arma sumpsit pro iure quod in Lotharingiam habebat, & Mirecurtem occupavit. *Crudeliter evasata terra Lotharingica Barrensisque (inquit Meyerus) sacrâ iuxta ac prophaniâ vis illata; nulli ordini, nulli etati Valdemontius pepercit.*

## C A P V T I V.

*Fridericus VI fuit Dux Lotharingia ex proprio capite, non uxoris Iolanda Andegauensis, adversus Anonymum.*

**A** NNO tandem M. CD. XLIV. Nanceij Fridericus, Antonij filius, sponsam sibi copulavit Iolandam, Renati Andegauensis & Bar-

& Barrensis Ducis filiam, annos natam sexdecim; atque ita *omnis* Wasseb. fol. 494. B.  
*propinquitās, quæ acerbo prius odio diuisa fuerat, mutuat rediuit in gratiam.*

Stephanus Paschasius, eius connubij causam altiùs repetens, in hæc verba loquitur: *Isabella Lotharinga, Renati coniux; post decessum patris sui Caroli contendebat Ducatum Lotharingiæ ad se pertinere, tamquam ad filiam & heredem Ducis: è contra Antonius affirmabat Ducatum illvm esse Fevdvm MARIBVS ATTRIBVTVM, QVODQVE IN COLVM DELABI NON POTERAT; seque adeò (quamuis à minori natu filio ortus esset) quia MAS erat; ab obtento iure illam Principem feminam excludere. Nouum belli argumentum inter Antonium & Renatum, in quo iste fortunam deteriore est expertus: factus enim Antonij captiuus, vt liberationis suæ rationem adinueniret, consensit in matrimonium IOLANDÆ filię suæ cum FRIDERICO Antonij filio: quò facto vnite sunt maiorum minorumque natu Lotharingiæ geminæ stirpes; idque optimo consilio, ad sedanda inter partes dissidia. Renatus nihilominus de illo contubio nusquam est oblectatus; quippe quòd ab eo extortum fuerat; ita vt continuo cogitaret de alio genero suo circumcendens.*

Illius porrò odij ea causâ fuerat, quòd Antonius Dux, Friderici patens, Renato Lotharingiæ possessionem quietam nullo modo reliquisset; San-Mart. l. 11. c. 7.  
*neque iuri suo armis prosequendo defuisset vnumquam. Cui adeò Diuinam fauissè Iustitiam palàm est, vt Renatus alieni vsurpator, exacto in vinculis sexennio, mutatoque naturæ ordine, funeribus natorum superstes fuerit, quibus contra ius fasque dominationem adscripserat. Cùm enim ratione vxoris Isabellæ nullum in Lotharingiam ius haberet, consequens est, eius filios ex parte matris ad illum Principatum nullum ius habuisse: quippe quòd totum manebat penes Antonium, licet iniquè expulsus; cùm ius non amittatur non vsu, quando non datur facultas vsus.*

Georgius Castellanus, æqualis Scriptor, refert bella & vltima quæ In ms. Historiæ.  
*que aduersus Renatum tentata à Duce Antonio ratione suæ hereditatis [ pour cause de son heritage ] & quomodo ad felicem exitum litem suam perduxerit per coniugium Friderici filij sui cum Iolandâ Renati filiâ: ita vt Fridericus in Maiorum hereditatem, quæ à Renato iniuste occupata fuerat, denuo sit ingressus. Et verè Fridericus (inquit Cæsar Nostradamus) ius & causam habebat ad auorum Ducatum; quippe qui directâ linæ ortum ducebat ab antiquis & legitimis Lotharingiæ Ducibus, quorum Ditiones à primis eius perillustris & REGALIS DOMVS Principibus in colum dilapsæ non fuerant, præterquam in isto Renato, qui*  
 C. *per*



per Isabellam uxorem suam, Caroli I. Ducis filiam, se declarauit, & aliquo tempore vindicauit in heredem & Dominum Ducatus.

Is ergo Principatus demum iure optimo ad Fridericum reuersus est: unde superstitite etiamnum socero, Lothariensè scutum Aquilulis insignè, sine vllâ fractione, purum purum prætulit; quale conspici-  
tur in templo S. Mauricij Andegauensis, in sacello Equitum Lunæ crescentis, ordine decimo sexto, vbi in tabella scriptum: FRIDERI-  
CVS SENATOR ORDINIS ANNO M. CD. LIV.

Apud San-  
Martha-  
nos.

In eodem sacello extat etiam ordine XIII. militare scutum Re-  
nati Andegauensis, Friderici soceri, transuersè sectum: in superiori  
parte elucet symbola, Hungaricum, Siculum, Ierosolymitanum;  
in inferiori verò Andegauense, Barrense, Lotharingicum: suprà in-  
scriptum est: PRIMVS SENATOR ANNO M. CD. XLVIII. Eadem  
quoque arma depicta extant in vetusto codice membranco cum hac  
incriptione: RENATVS REX HIERVSALEM ET SICILIÆ, DVX  
ANDEGAUENSIS ET BARRENSIS, COMES PROVINCIÆ, SENA-  
TOR ANNO M. CD. XLIX. prætermisso planè Ducis Lotharingiæ  
titulo; cuius tamen Ducatus quadrans in vltimo scuti laterculo ex-  
pressus est, ad obtenti falsò iuris qualecumque indicium: si enim  
de Lotharingiæ Ducatu plenè fuisset inuestitus à Cæsare Renatus,  
Lothariensem tesseram honoratori collocasset laterculo, & L O-  
THARINGIÆ DVCEM illo loco palàm se inscripsisset.

Boullayus  
in Gen.  
Lothar.

Pergò in instituto: Post Friderici Ducis obitum Iolandis eius vi-  
dua nullo alio vsa est titulo quàm Ducisse Barrensis, ex Renati parentis  
facultate, qui vivebat adhuc in Prouinciâ. Non igitur illius causâ Fri-  
dericus Lotharingiam possederat; quandoquidem post coniugis  
obitum eo titulo non est vsa.

Lib. 7.  
fol. 51 5. b:

Præterea, cum Iolanda eadem ab excessu Friderici mariti voluif-  
set Lothariensis Ducatus regimini se immiscere; Proceres & Nobiles  
Lotharingiæ (inquit Wasseburgius) ex Ordinum Ducatus sententiâ de-  
creuerunt se velle virum Principem habere, neque per feminam regi. Ideo-  
que RENATVS IUNIOR, Friderici filius, Ducatum in suas manus ac-  
cepit. Ita Champerius quoque de Renato iuniore: Vocatus fuit à  
Proceribus & Ordinibus, ut acciperet Ducatum Lotharingiæ. Eorum ac-  
cerstu, à Ionevillâ statim venit Viselsam, Vaudemontani Comitatus op-  
pidum. Inde perrexit Nanceium, vbi agebat Iolandis eius mater, Renati  
Siciliæ Regis filia, quæ publicæ rei administrationem ambiebat, volebatque  
dum viveret pro Ducissâ haberi; quia (dicebat) Ducatus ex iure matris  
Isabellæ, Caroli Ducis filia, ad ipsam pertinebat: sed per Ordines & Nobi-  
les statutum fuit, quòd ipsi virum Principem haberent; quodque non ex-  
pediebat

Lib. 3. c. 2.

pediebat Lotharingicam ditionem ( quæ extrarijs est confinis ) gubernari per feminam. Sicque Ducatus Renato eius filio commissus fuit. Roserius idem affirmat paucioribus hisce verbis: Iolanda verò, suscepti Ducatus Tomo 5. initio, Lotharingie Principes, MVLIEBRE IMPERIVM DETRECTAN- cap. 86. TES, quævis sinistra machinabantur; nec cessarunt, donec Renatus filius iura capefferet. Quod si Lothariensium testimonia non sufficiunt, audi Catolum Stephanum Franco-Gallum: Lotharienses IOLAN- In Histor. Lothar. DAM, Renati matrem, ad gubernandum admittere noluerunt.

Ex quibus palàm fit, quàm à vero sit alienum, quod ab Anonymo iactatum ambitiosius; nempe, antiquam Lotharingie consuetudinem esse, gubernationi feminarum subijci. Nam & sequenti sæculo, post excessum Francisci I. Ducis contrarium eluxit: Erat ei frater Nicolaus Cap. 89. Metensis Antistes (inquit Roserius) inter quem & Christinam, Ducis reliquam, de Caroli adhuc pueruli tutela administratione magna contentio exoritur: Nobiles enim Nicolaum expetebant, neglecto MVLIEBRI imperio.

Obtrudit insuper Anonymus ex Nicolao Remigio comparationem Feudorum in Lotharingâ seruientium, ad Lotharingie dominans Feudum: subiungitque eiusmodi argumentum: Ad illa succedunt femina; ergo & ad istud. Sed vana est consequentia: in Lotharingiâ enim minora & ordinis secundarij Feuda, ex inductâ paulatim consuetudine, & Principum tolerantia, redacta sunt ad instar patrimonialium: superius autem ac dominans non item; quòd ex antiquissimâ LEGE SALICA primum, deinde ex STATVTO IMPERII, vltimò denique ex IVRE FAMILIARI (vt iamiam ostendemus) est masculinum.

In libro de Renati gestis.

## C A P V T V.

Vnio perpetua Ducatum Lotharingia & Barri: uterque Principatus est masculinus ex FAMILIARI IVRE.

TESTAMENTVM RENATI DVCIS EX AVTOGRAPHO GALLICO DESCRIPTVM, ET LATINE BONA FIDE CONVERSVM.

**I**N NOMINE gloriose & indiuidue Trinitatis, Patris, Filij, & Spiritus sancti, Dei vnus in essentia & trini in personis.

Ex Arch. Lothar.

RENATVS Dei gratiâ Rex Ierusalem & Sicilia, &c. Dux Lotharingia & Barri, &c. Marchisus Marchio Pontis, Comes Prouincia, Vaudemonij, Aunemalie, & Guise, omnibus presentibus & futuris salutem.

Notum facimus, quòd nos memores instabilitatis rerum creatarum, illiusque legis, quâ tum à Deo, tum à natura sancitum est, citius aut serius semel omnibus hominibus moriendum esse; idque tam incertum esse, quando

futurum sit, quàm certum est, aliquando futurum: idèò volentes de bonis, nobis à Deo concredit, statuere, & ne morte præoccupati intestati discedamus; sanà mente, quæ Deo sit laus, integrâque valetudine, consultò prudenterque Testamentum, Ultima Voluntatis nostra sententiam, fecimus & conscripsimus, facimus & conscribimus hoc modo.

- I. Primò, quia Deo Creatori nostro, Diuinæque suæ bonitati placuit ad Christianæ fidei mysteria nos vocare, & sacrosanctis Baptismi aquis initiare, cuius propterea nomen benedictum sit in æternum, ex nunc in perpetuum, protestamur velle nos constantes in susceptâ fide Catholicâ permanere, & ne latum quidem unguem ab eâ recedere. Si quæ vel vi morbi, vel demonis impulsu (cuius præcipuum studium est animas perdere) vel quavis aliâ ratione in errorem Orthodoxæ fidei contrarium pertrahemur, id nobis inuitis, & citra consensum nostrum euenturum. Atque misellam hanc animam nostram in Conditoris sui manus prompti ac lubentes reponemus, quando cumque libuerit eam de suâ mortali statione reuocare, obtestantes Diuinam suam Maiestatem, ut ob merita cruentæ Passionis, pretiosisque Sanguinis effusionis Filij sui, ac Seruatoris nostri IESV CHRISTI, creaturam suam Beatorum Regno donare velit: simul obsecrantes sacratissimam gloriosissimamque eius Matrem, ut ad id impetrandum suum nobis patrocinium accommodet; atque Beatissimum Michælem, cælestis militiæ Ducem, quem præcipuo semper honore coluimus, ceterasque Angelorum Hierarchias, ut dignentur eam tueri contra communem hostem generis humani, Deoque sistere perpetuò beandam.
- II. Item locum sepeliendo corpori nostro eligimus in ade S. Francisci Nanceij à dextro principis altaris latere murum versus, ultra chori sellas: quam adem in fundo nostro construximus; unâ cum muris ac septis Cœnobij: volumusque corpori nostro imponi monumentum æneum planæ formæ, altitudinis non maioris quàm ut quis libellum gestans flexis genibus ei commodè inniti possit, eiusdemque monumenti lamina superiori effigiem nostram incidi, cum epitaphio per totum circa margines exarato.
- III. Item volumus & statuimus, ut contractum à nobis æs alienum dissoluatur, damnaque, de quibus legitimè constabit, resarciantur eâ ratione, quâ secundum æquitatis rationisque leges teneri deprehendemur.
- IV. Item volumus & statuimus, ut funus & exequia nostra instruantur arbitrio Curatorum Testamenti nostri infra nominatorum, utque die sepulture nostræ quilibet Sacerdotes Sacrum facturi admittantur tam in eadem nostram Sancti Georgij Nanceij, vulgò dictam Prioratus nostræ Domine, & Sancti Apri, quàm dictorum Fratrum; atque singulis in stipendium pendantur quinque grossi in honorem quinque plagarum Seruatoris ac Redemptoris nostri IESV CHRISTI.

Item



Item ut dictâ die fiat publica stipis erogatio quibuscumque mendicis, panis, V.  
vini atque pecunie. Quod si prædicta Sacra & eleëmofynæ non possint  
commode fieri die sepultura nostræ, in sequentem diem reiciantur.

Item volumus & statuimus, ut tria primi ordinis Sacra funebria ad VI.  
minimum celebrentur præmissis Defunctorum Officio, & primum quidem  
in prædictâ aede Fratrum, alia verò duo in nostrâ prædictâ aede Sancti  
Georgij, cuius sumus paræci; utque prædictorum trium Sacrorum diebus  
quilibet Sacerdotes admittantur ad celebrandum in prædictis Ecclesijs, ac  
singulis quinque grossi in singula Sacra distribuuntur, atque eleëmofynæ  
pauperibus, modo supra præscripto.

Item donamus, legamus, erogamus singulis Ecclesiarum Cathedralium VII.  
Tullensis, Metensis, & Viridunensis, summam sexcentorum francorum,  
idque semel dumtaxat, ut statim ab obitu nostro, & deinceps quotannis, die  
prædicti nostri obitus, ad salutem & leuamentum animæ nostræ, nostræque  
charissimæ coniugis ac sponsæ, Domine PHILIPPÆ Geldrensis, funebre  
Sacrum solemniter decantent, præmissis pridie Defunctorum Officio.

Item pariter donamus & legamus Ecclesiæ nostræ & Capitulo Sancti VIII.  
Georgij alios sexcentos francos annuos semel; atque ita tenebuntur statim  
ab obitu nostro Sacrum funebre solemniter celebrare in dictâ Ecclesiâ, &  
singulis quaternis ieiunij temporibus in perpetuum recitare Officium mor-  
tuum, & postridie Missam funebrem decantare ob finem supra dictum:  
cuius obligationis exempla duo tradent Capitula dictarum Ecclesiarum, ut  
in Archiuis nostris, Nanceiano & Barrensi, asseruentur: eâ etiam lege, ut  
prædicta Ecclesiæ & Capitulum Sancti Georgij contenti sint medietate fru-  
ctuum, quos recipient in Ecclesiâ prædictâ Fratrum ratione nostræ sepul-  
turæ & exequiarum.

Item donamus & legamus Ecclesijs & Conuentibus Fratrum Mino- IX.  
rum, & Sororum Sancti Francisci Reformatum de Obseruantia, existen-  
tibus in nostris Lotharingia & Barri Ducatibus, locisque insertis, summam  
mille francorum semel; quos prædicti Curatores pro domorum & locorum  
inopiâ diuident, eos ad id obligantes, ut pro salute nostrâ precibus suis ac  
suffragijs apud Deum specialiter intercedant.

Præterea volumus & statuimus, ut omnes & quacumque fundatio- X.  
nes, quas nos & charissima nostra coniux & sponsa antea instituimus, ob-  
seruentur & stent in perpetuum; speciatim Sacra duo quolibet die sacelli  
nostri Annuntiata, & Sanctæ Magdalene existentis in prædictâ nostrâ  
aede Sancti Georgij: versus O SALVTARIS HOSTIA, quando sacrum  
CHRISTI corpus adorandum populo proponitur in summo Sacro dictæ  
Ecclesiæ: quaque Dominicâ pastelli puerorum, qui prædictum versum can-  
nunt, eâ lege, ut annis singulis recitent AVE MARIA ad intentionem  
nostram

nostram in supplicatione victoria, quam Dei auxilio pridie Epiphaniæ retulimus aduersus Carolum Burgundiæ Ducem, Nanceium obsidione liberantes. Anniversarium Sacrum cognati nostri, Ducis Nicolai, XXIV. die Iulij; solemnitas Sancti Renati XII. die Nouembris, & nostrum anniversarium Sacrum, quod modò postridie dicti Festi decantatur, & quod post mortem nostram ipso mortis nostra die cantabitur eâ solemnitate, quâ quotidie summum Sacrum canitur in Ecclesiâ Cathedrali Tullenſi, in quo speciatim nominamur: & SALVE REGINA, quod quolibet Sabbato canitur post Completorium à Vicarijs dictæ Ecclesiæ in sacello maiori Sancti Georgij. Item Officium Sancti Renati die ipsi sacro; & postridie Defunctorum Officium: Sacra duo quotidiana, vnum quinque plagarum CHRISTI DOMINI, alterum Annunciata, atque SALVE REGINA, qualibet hebdomade, eo die in quem incidet Festum Annunciata, cum DE PROFUNDIS & Collectis mortuorum: quidecim cerei, qui accendantur dum canitur SALVE: quod fundauimus in æde nostrâ Sancti Marci Barri. Similiter Officium Sancti Renati & Defunctorum in nostrâ æde Sanctæ Crucis Musſiponti, eo modo quo illud fundauimus in prædictâ æde nostrâ Sancti Georgij, & anniversaria tria Sacra decantata quoque anno XXIIII. Februarij in Monasterio Sancti Michaëlis, quemadmodum dictæ foundationes fusiùs exponuntur & continentur in Tabulis ad id confectis; quarum exempla asseruamus in Archiujs nostris Nanceij & Barri: quas foundationes ratificamus, confirmamus, & in quantum necesse esset, denudò inflauramus tenore huiusce præsentis nostri Testamenti.

- XI. Item quia nostri prædicti DVO DVCATVS, LOTHARINGIÆ ET BARRI, modò sibi inserti mutuo coherent; & quia, propterea quòd olim in duos Dominos diuisi erant, plurima inde bella hostiliter acta, inimicitia, incommoda grauiâ, tristissimique casus contigerunt prædictis regionibus, maximo damno dictorum Ducatum, Nobilitatis, Vassallorum, indigenarum, & subditorum, maximopereque verendum est, ne si posthac disungerentur, eadem mala rursus recurrerent; ideò quatuor nobis charissimorum ac dilectissimorum filiorum, ANTONII videlicet, CLAVDII, IOANNIS, & LVDOVICI, volumus vt prædicti IOANNES & LVDOVICVS, atque is quem modò prædicta nostra coniux vtero gestat, si masculus est, sequantur Ecclesiasticum ordinem in Ecclesiâ Metensi: adhuc quia præter nostros duos dictos Ducatus possidemus agros & Dominia tam in Franciâ, Normanniâ, Flandriâ, Picardiâ, Germaniâ, quam alibi, ad abundè compensandum prædictum nostrum filium CLAVDIUM, his & pluribus alijs rationibus permoti, insituimus prædictum ANTONIUM, PRIMOGENITVM NOSTRVM, HEREDEM DVORVM prædictorum DVCATVVM LOTHARINGIÆ & BARRI, cum omnibus suis pertinentijs, Ditio-  
nibus,

nibus, & Dominijs insertis ac inclusis. Volentes & statuentes; ut solus & in solidum succedat, neque possint prædicti eius fratres in ijs quidquam petere aut mouere. Derogantes quoad hoc omni iuri atque consuetudini contraria regionis: quibus prædictis duobus nostris Ducatibus comprehendimus volumus Marchionatum Pontensem, & Comitatum Vaudemontij.

Item volumus pariter ac statuimus, ut prædictus noster filius CLAVDVS succedat in id omne quod superest nostræ prædictæ Ditionis & Dominiij situm tam in Franciâ quàm Normanniâ, Picardiâ, Flandriâ, & alibi; cuius eum instituimus heredem unicum, & in solidum; sic ut eius fratres non possint pariter de eo quidquam sibi vendicare. XII.

Quod verò attinet ad Regna nostra Sicilia & Arragonie, Ducatum Andegauensem, Comitatum Prouincie, & Meduane, aliasque Ditiones ad nos pertinentes, quarum hætenus possessionem non adiimus, volumus & statuimus, ut filius noster primogenitus ANTONIVS, eiusque liberi MASCVLI legitimis nuptijs nati, in ijs nobis succedant, sintque heredes nostri, neque fratres eius possint in iisdem portionem suam petere. XIII.

Item, si ante mortem nostram non esset prouisum prædicto filio nostro LVDOVICO de Episcopatu, vel alio Beneficio Ecclesiastico, sex millibus florenorum annuatim æstimato; eo casu volumus ut habeat, accipiat, ipsique assignetur in portionibus prædictorum suorum fratrum ANTONII & CLAVDII summa sex millium florenorum annuorum, ex æquo à prædictis ANTONIO & CLAVDIO soluendorum, idque dumtaxat donec prædictum Beneficium consecutus sit. Quod si Statum Ecclesiasticum sequi, vel prædictâ assignatione contentus esse nolle, velletque in prædictâ nostrâ hereditate portionem suam obtinere, tum eum constituimus heredem trium millium florenorum annuatim, ex æquo de bonis prædictorum suorum fratrum ANTONII & CLAVDII desumendorum, idque quamdiu viuet dumtaxat. XIV.

Quantum ad filium nostrum IOANNEM, volumus contentus sit dicto Episcopatu Metensi, pro cuius impetratione magnos sumptus fecimus; præterea quod prædictus Episcopatus abundè ei suppedabit, unde status sui splendorem tueatur: si tamen huic nostræ constitutioni ac voluntati stare nolle (quod futurum non putamus) velletque in partem hereditatis venire; volumus & statuimus, ut prius, & ante omnia, promptè & paratè refundat prædictis ANTONIO & CLAVDIO summam sexaginta quatuor millium florenorum, qui pro prædicti Episcopatus procuratione numerati fuerunt; atque nihilominus volumus ut contentus sit annuo censu trium millium francorum, capiendorum, colligendorum, & ei assignandorum à prædictis suis fratribus ANTONIO & CLAVDIO equaliter: cuius summa heredem illum instituimus ad eâ fruendum & utendum quamdiu viuet dumtaxat. XV.



XVI.

Et quia prædicta nostra coniux & sponsa modo grauida est, volumus & statuimus, ut si masculus est, sequatur etiam Statum Ecclesiasticum, siue secularem, siue regularem; atque dum ipsi prouisum fuerit de Beneficijs, quorum redditus annuus ad tria florenorum millia pertingat, ANTONIVS & CLAVDIVS ei attribuant summam trium millium florenorum annuorum, colligendam in suis Ditionibus ac portionibus hereditarijs ex aquo. Quod si non acquiescat, velitque in hereditate nostrâ portionem suam obtinere, instituimus eum heredem summe trium millium florenorum annuorum, ex aquo sumenda, colligenda atque ei assignanda à prædictis suis fratribus ANTONIO & CLAVDIO, quamdiu viuet dumtaxat. Quod si femella esset, volumus & statuimus, ut in matrimonio collocetur, doteque pecuniariâ instruatur pro conditionis suæ gradu; quam eius prædicti fratres ANTONIVS & CLAVDIVS de aquo suppeditabunt, usque ad summam quinquaginta millium florenorum ut minimum; dummodo tamen ob prædictam summam filia nostra renunciet omnibus successionibus paternis & maternis: cuius quinquaginta millium florenorum summa eam heredem instituimus.

XVII.

Item volumus & statuimus, ut si prædictus noster primogenitus ANTONIVS migraret è vitâ, nullâ relictâ prole MASCVLÂ in legitimo matrimonio procreatâ; eo casu prædictus noster filius CLAVDIVS, ac eius liberi MARES ex legitimo matrimonio oriundi, eius sint successores & heredes. Et contrâ, si prædictus CLAVDIVS decederet nullâ relictâ prole MASCVLÂ ex legitimo matrimonio; prædictus ANTONIVS, & eius liberi MASCVLÂ nati pariter ex legitimo matrimonio ei succedant in Ditiones & Dominia suprâ nominata.

XVIII.

Item, si prædicti ANTONIVS & CLAVDIVS decederent non relictâ prole MASCVLÂ ex legitimo matrimonio procreatâ, eo casu volumus, ut MAIOR NATV (ex filijs nostris supersitibus, qui non erunt sacris Ordinibus initiati, aut Religiosi professi) eiusque descendentes MARES ex legitimo matrimonio, ipsis in Ditiones & Dominia suprâ nominata succedant.

XIX.

Atque hoc deficiente, eiusque heredibus, filiorum nostrorum proximis, eiusque proles MASCVLÂ legitima, & modo suprâ descripto, volumus, ut prædicti nostri filij, eorumque posteri MARES sibi inuicem succedant vi iuris SVBSTITVTIONIS, quam per hoc Testamentum facimus.

XX.

Quibus institutis & substitutis deficientibus, volumus, mensque nostra est, ut prædicta nostra Ditiones & Dominia, aliâque bona redeant ad nostros heredes ac successores secundum iura & consuetudines regionis, & locorum, in quibus Ditiones nostra atque Dominia sita & constituta sunt.

Item

Item quod ad nostram charissimam & dilectissimam coniugem Dominam PHILIPPAM Geldriae attinet, rata habemus dona & assignationes dotis, quas ei dedimus postremo quodam rescripto, sigillo nostro munito, in nostro castello de Louppy, dato XI. die presentis mensis & anni, videlicet primo, Urbem, Castrum & Praefecturam Barrensem, cum omnibus pertinentijs & appendicibus subiectis praedictae Praefecturae Barrensi dumtaxat. XXI.

Item Baroniam Ionville, Urbes & Castella eiusdem, quae continent Roumoyum, Rupem ad Matronam, Esclaron, la, Lignecurtem, Imbercurtem, Eurwillam, Trifontium, Sorbeam, Arnevillam, cum omnibus alijs appendicibus & pertinentijs, ad ijs omnibus fruendum & utendum quamdiu viuet, casu quo dos ei obtingat. XXII.

Item res mobiles & acquisitas, modo & norma recipi solita ab omni re tro memoria in Ducatibus Lotharingiae & Barri, & pro locorum conditione, in quibus bona constituta essent, die qua ei dos obtinget; exceptis tamen antiquis pigneratijs ad nos transmissis à nostris praedecessoribus, Ducibus & Comitibus dictorum Ducatum. XXIII.

Item in augmentum dictae dotis, ut conditionis suae gradum cum splendore retinere possit quamdiu vidua manebit, nec transibit ad secundas nuptias, & non aliter, aut ultra, Ditionem & Dominium de Sable & Celsieres, Ditiones & Dominia Condati ad Mosellam, cum pertinentijs & appendicibus earundem duarum Ditionum & Dominiorum; uti id omne fusiùs expressum est & exaratum in praedictis tabulis, quas volumus & statuimus, ut suum plenum sortiantur effectum, non obstantibus nec adversantibus nostris heredibus, successoribus, & ius habentibus; volumusque & statuimus, ut quamdiu vidua permanebit, regimen, tutelam, curam praedictorum nostrorum liberorum obtineat, usque dum minores annos excesserint, cum possessione bonorum omnium constante nostro matrimonio à nobis acquisitorum. XXIV.

Item volumus, ut immunis sit ab omnibus debitis, quae decessores nostri contraxerunt, solumque ad ea soluenda teneatur quae nos ipsi contraximus. XXV.

Item, quia famuli & administri nostri nobis fideliter & sedulo inservierunt, eosque fuimus experti probos ac integre fidei; volumus & statuimus, ut in suis muneribus retineantur quoad viuent, cum stipendijs, pensionibus, alijsque remunerationibus, quibus frui reperientur die nostri obitus; serio mandantes, ac precipientes praedictis nostris filijs in virtute obedientiae, quam filij progenitoribus debent, ut eos in illis retineant, si modò nihil committant, quare legitime illis privari ac exui mereantur. XXVI.

Item eligimus, creamus, designamus in Curatores presentis huius Testamenti, atque ultima voluntatis, praedictam nostram charissimam & dilectissimam  
D  
etissimam XXVII.

*Etissimam coniugem & sponsam, atque primogenitum nostrum filium ANTONIVM, charissimosque nostros ac fideles Consiliarios, VARINVM DOMP-MARTINVM, Episcopum & Comitem Viridunensem, D D. HYGONEM DES HAZARDES, electum Tullensem, & HARDY FILLON, Aula nostra Praefectum: quorum arbitrio omnia nostra bona, redditus fructusque annuos permittimus, ad perficiendum ac executioni mandandum quidquid in illo praescribitur.*

XXVIII.

*Quod praesens nostrum Testamentum, tamquam ultima voluntatis nostra decretum, volumus ratum sit, suumque sortiatur plenum effectum: atque si irritum est in ratione Testamenti solemnitis, saltem ratum maneat integrumque in ratione Testamenti nuncupatiui, vel nuda & simplicis dispositionis, aut codicilli, vel donationis causa mortis, vel partitionis bonorum inter praedictos nostros filios, eorumque descendentes; neque volumus quodlibet aliud a nobis antehac confectum Testamentum aut dispositio locum habeat, suumque sortiatur effectum; eaque reuocamus, rescindimus, abrogamus. Protestantes nihilominus retinere nos potestatem addendi, demendi praedicto Testamento, imò totum innouandi, quandocumque nobis libuerit usque ad obitum nostrum.*

XXIX.

*In quorum omnium & singulorum supradictorum fidem, atque ad maiorem securitatem eorum & firmitatem, volumus & statuimus, ut praesentis huius Testamenti tabulae, quas duplicauimus, legantur & promulgentur a morte nostra in Curia forensi ciuitatis nostrae Nanceianae coram Bailliuis ac Nobilibus illic congregatis; atque in Curia Sancti Michaelis coram Bailliuo loci, & Assessoribus Forenses conuentus agentibus; in Curia Officialis Tullensis, sedentis in suo tribunali ad audiendas & decidendas controuersias dictae Curiae; a quibus petimus & postulamus, ut velint apponere & appendere sigillum dictae Curiae, una cum nostro, huic praesenti nostro Testamento, quod chirographo nostro firmauimus, fecimus, transegimus in nostro castro de Louppy anno a Christo nato millesimo quingentesimo sexto, XXV. die Maij.*

Anno  
1506.

Haecenus supremæ tabulae Ducis Renati, in quibus habes vnionem perpetuam atque substitutionem masculinam Ducatum Lotharingae & Barri, Articulis XI. XVII. XVIII. XIX. & XX. Sed praeterea sciri necesse est, a Renati Ducis excessu, Philippam Ducissam eius viduam amborum Ducatum ternos Ordines conuocasse, qui congregati XII. Februarij anni M. D. VIII. solemnī sacramento se obstrinxerunt ad vnionis & masculinae substitutionis strictam obseruationem; decernentes vtramque in posterum fore vtriusque Status columen & fundamentum.

Id porro consilij maximè sumpserat Dux Renatus ob exortas publicae



publicæ rei perturbationes, post obitum Caroli I. Lotharingæ Ducis, inter Antonium Vaudemontanum & Renatum Andegauensem: quod ne futuris accideret temporibus, Dux Renatus, Salicæ legis decreto iuribusque Imperij domestica accumulando, prohibere voluit per vtriusque Ducatus perpetuam iunctionem, & substitutionem masculinam Principum qui à se propagarentur, quorum in hanc vsque diem hæc est series.

*Stemma posterorum Renati Ducis Lotharingæ & Barri, Vnionis atque Substitutionis auctoris.*

5. RENATVS Dux Lotharingæ & Barri.

6. ANTONIVS II. Dux Lotharingæ & Barri.

6. CLAVDIVS Dux Guisæ, Caput Ducum Guisæ, Meduanæ, Aumaliæ, Cheurofij, Ellebouij.

7. FRANCISCVS I. Dux Lotharingæ & Barri.

7. NICOLAVS Dux Mercurij, Comes Vaudanimontis.

8. CAROLVS II. Dux Lotharingæ & Barri.

8. CAROLVS Comes de Chaligny, pater Henrici Marchionis de Mouÿ, & Francisci Episcopi Virdunensis.

9. HENRICVS Dux Lotharingæ & Barri: obiit absque masculâ prole.

9. FRANCISCVS II. Dux Lotharingæ & Barri.

10. CAROLVS III. Dux Lotharingæ & Barri.

10. Dux NICOLAVS - FRANCISCVS.

11. FERDINANDVS - PHILIPPVS.

11. CAROLVS - NICOLAVS.

His addere iuvat sententiam Equitis Didaci Saavedræ Faxardi, *Emblemate 70. edit. Mediolan.*  
*re Marzphre, qui doctè censuit, successionem seminarum ad Regna magna esse magnis Principibus utilitatis; quia sæpè per matrimonia eorum familiæ accedunt magni Status; ut contigit Castellana & Austriacæ. At verò in minoribus Principatibus non ita; quia dum heredes femina Regibus copulantur, perit familiæ nomen ac supremum decus; quia minor ditio à maiori absorbetur.*

*Contestatio denunciatio Claudij Guisia Ducis pro  
Testamenti Renati Ducis obseruatione.*

Ex Archi-  
uo Ducum  
Guisia,  
An. 1540.

**H**ODIERNA die, Augusti XIX. anni M. DXL. in castro Barri-Ducis, Præcellus & præpotens Princeps CLAVDIVS A LOTHARINGIA, Dux Guisia, Par Franciæ, Comes Aumalia, Baro Meduane & Jo-neuilla, Senescallus Campaniæ, Locum tenens Generalis pro Rege in Burgundia, Campaniæ, & Briâ, in præsentia nostrâ, Petri Blandin, & Ioannis Baudesson, Notariorum Regionum in Bailliatu Vitriacensi hic subscriptorum, Præcellso & Illustr<sup>mo</sup> Principi ANTONIO DVCI LOTHARINGIÆ ET BARRI fratri suo, cum egrederetur è cubiculo, & iret ad Sacrum audiendum iuxta Ecclesiam dicti castri, dixit & pronunciauit isthac verba: Domine, mihi dictum est, quod per tractatum matrimonialem, quem facitis pro ANNA filiâ vestrâ, vos illam reuocatis ad successionem vestram, defectu masculorum: id quod non potestis facere, quia dicto casu scitis titulos Regnorum Siciliæ & Aragoniæ, Ducatum Andegauensem, Ducatus Lotharingiæ & Barri, Comitatum Prouinciæ, & alias terras, non posse reuerti, nec deuolui in dictam ANNAM, aut eius heredes, sed in ME, & HEREDES MEOS MASCVLOS, eo modo quo cautum est & continetur Testamento defuncti Regis PARENTIS NOSTRI, cuius Deus misereatur: quod Testamentum per vos, Domine, & per ME confirmatum fuit, & pro rato habitum. Quocirca VOBIS declaro, ME nullo modo consentire dicto pacto matrimoniali, MEQUE protestari, quod nec mihi nec meis heredibus villo modo possit præiudicare, quibus ius in dicto casu est acquisitum. Subiecit deinde statim: Domine, auditis quod vobis dico. Qui Dominus DVX LOTHARINGIÆ nos respiciens Notarios suprâ nominatos, & annuens capite, dixit & respondit: Ita, ego vos benè intellexi. Et inde simul ingressi sunt Ecclesiam ut Missam audirent. A nobis autem petijt & requisivit Dominus DVX GVISIÆ actum & instrumentum dictæ suæ declarationis & protestationis, quod ipsi dedimus, ut eo uti posset tempore & loco secundum ius & rationem. In cuius rei testimonium ego Theobaldus Lorrad Scutifer, custos sigillorum pro contræctibus Præposituræ Vitriacensis, relationem dictorum Notariorum sigillis eorum & chiographis munitam firmauimus sigillo dictæ Præposituræ Vitriacensis. Actum & datum die & anno supradictis. Subscriptum Blandin & Baudesson, cum sigillo appendente in cerâ viridi.

Anna

Anna illa, Antonij II. Lotharingæ Ducis filia, primis nuptiis iuncta fuit Renato Nassouio Cabilonenſi, Auraicæ Principi; ſecundis autem Philippo Croyo Duci Arſchotano; qui eam duxit anno M. D. XLIX. ſuſcepitque ex illâ vnicum filium Carolum Philippum Croyum, primum Haurechi Marchionem.

Pontus  
Heuterus  
in Geneal.  
Croyacâ.

## C A P V T VII.

*Charta Tranſactionis, quâ conſtat Antonium II. Ducem,  
Renati parentis ultimam voluntatem  
Teſtamento confirmâſſe.*

**N**ICOLAUS A LOTHARINGIA, Dei gratiâ Adminiſtrator perpetuus Episcopatum Metenſis & Virduenſis, Abbas commendatarius Mediani Monasterij, &c. vniuerſis præſentibus & futuris ſalutem. Chariſſimus noſter Dominus & parens feliciffima recordationis, cuius animæ Deus miſereatur, ex Teſtamento & ſupremâ voluntate heredem ſibi ex aſſe inſtituit chariſſimum noſtrum Dominum & fratrem FRANCISCVM A LOTHARINGIA, eâdem gratiâ hodiernum Ducem Calabria, Lotharingæ, Barri, & Geldriæ, Marchiſum, Pontis Marchionem, Comitem Provincie, Vaudanimontis, Albimontis, Zutphanie, &c. in vniuerſis ſuis Ditionibus, Ducatibus, Marchionatibus, Comitatibus, Baronis, & ceteris quibuſcumque bonis, terris & Dominiis, ubicumque locorum ſitis, & conſtitutis, atque ab eodem obtentis, & poſſeſſis, ſive per rectam, paternam maternamve, ſeu per tranſuerſam ſtirpem ad eum deuolutis, vnâ cum omni iure tam hereditatis quàm ſucceſſionis tranſuerſariæ, quæ ei poterant obuenire, imò & acquiri, ſine ullâ exceptione aut reſervatione. Nobis verò conſtituit, legauit, donauitque dumtaxat ex eiſdem tabulis pro iure hereditatis, & legitime ex omnibus ſuis bonis, tamquam filio competentis, quatuor & viginti francorum millia Lotharingicæ monetæ cenſus annui & vitalitij, duabus æquis penſionibus pernumeranda; nempe in Natalitijs Chriſti Domini, & Beati Ioannis Baptiſtæ. At verò ubi dictum Teſtamentum reſignarunt dilectiſſimi Domini noſtri ac patrui IOANNES, miſeratione diuinâ Sacræ Rom. Eccl. Cardinalis Sancti Honuſrij, vulgò dictus à Lotharingiâ, Archiepiſcopus ac Primas Narbonenſis, Episcopos Albigenſis, Nannetenſis, & Agimnenſis, Abbas commendatarius Cluniacenſis, Feſcanienſis, Maioris Monasterij, Sancti Audoeni, &c. atque vnâ CLAVDIUS A LOTHARINGIA, eâdem gratiâ Dux Guſiæ, Pâr Franciæ, Marchio Méduanenſis, Comes Aumaliæ, &c. coram nobis & dicto fratre noſtro, haudquaquam ei aſſentiri potuimus; vt pote qui grauioſum omnino, quàm vt ferri poſſet, iniuriam & detrimentum in hereditatis & ſucceſſionis iure ex tot



tamque præclaris Principatibus & Dominis ab eo relictis patiebamur. Nihilominus intuitu amoris, quò à naturâ ipsâ ferimur, & quoad licebit feremur in dictum Dominum & fratrem nostrum primogenitum FRANCISCVM, &c. quoniam insuper ex alienum, obligationes & hypothecæ, quas defunctus parens noster contraxit, immensæ sunt, & propemodum eidem intolerabiles; tum verò de suâ & consilio dictorum Dominorum ac patruorum nostrorum, qui concordia inter nos fratres concilianda intercessores & arbitros sese exhibuerunt, nec non ex aliorum virorum sapientum & doctorum, quos consulimus, sententiâ, ad maius nostrum commodum, liberè & spontaneè certiores de rei totius momentis facti, & bonâ naturalique voluntate non inducti, vel seducti, consensimus, probauimus, ratum habuimus, & esse iussimus; consentimus, probamus, ratum habemus, & esse iubemus his litteris dictum Testamentum, & postremam defuncti Domini ac patris nostri voluntatem, in singulis eius capitibus, substantiâ, articulis; eâ lege & conditione, quòd dictus Dominus ac frater noster FRANCISCVS, ex pactis inter nos conuentis, in supplementum & augmentum, perfectionemque legitimæ nostræ, consensit nobis & hereditibus nostris constitui censum annuum, qui conditionem & naturam hereditatis obtinebit, à nobis & hereditibus nostris percipiendum ex prouentibus & fructibus Ducatus Barrensis per manus Quæstoris eiusdem generalis presentis, & deinceps futuri; insuper eiusdem supplementi iustæ legitimæ gratiâ nobis cessit, & addixit hereditariæ ac in perpetuum ius, & actionem omnem, quam sibi vendicabat in Baroniâ, agris, ac Dominio Mercurij in Aruerniâ, nec non in eiusdem Oppidâ, Castris, Arcibus, Oppidulis, pagis, feudis, hominijs, censibus, & prouentibus quibuscumque, eorumque appendicibus; omne denique ius dimidiatum quod habet ex integro illo Dominio ad utrumque nostrum deuoluto per mortem felicitis memoria charissima Domina matris nostræ RENATÆ Borboniæ, &c. quam medietatem in manus nostras à se abdicauit. Quæ supplementa & accretiones cum ita se habeant, ut ijs nobis abundè satisfactum, atque de compensatione & hereditatis portione cautum sit: & aliâs, uti dictum est, perspecta habeamus nomina & obligationes, quibus præfatus frater noster supra quàm propemodum ferendum sit, grauetur. Tum etiam ut VNIO DVCATVVM LOTHARINGIÆ ET BARRI, Marchionatus Pontis, Comitatum Vaudanimentis, Albimontis, aliarumque Terrarum in iis contentarum (quam VNIONEM optauit & inchoauit charissimus Dominus & auus noster DVX RENATVS, Rex Sicilia; cui Deus sit propitiûs; deinceps verò persequutus est, & perpendit præfatus Dominus DVX ANTONIVS parens noster in suo Testamento, utpote quæ plurimum vergit in ampliacionem & decus Domus Lotharingiæ, ex quâ prognati sumus, quamque aded optamus omnibus

nibus votis florere, augeri, & nullatenus imminui) inuiolata conseruetur, quoad in nobis erit, iuxta TESTAMENTI præfati & ultima voluntatis præscriptum; de liberâ & naturali voluntate nostrâ cessimus, & vi harum litterarum cedimus tam specialiter quàm generaliter OMNI LVRI hereditatis, successionis, & acquisitionis, quâ per seriem generis rectam, quantumvis antiquam, quâ per transfuersam deuoluto, in gratiam dicti Domini ac fratris nostri, eiusque heredum, ac eorum quos eius res quouis nomine continget, omnibus Principatibus, Ducatibus, Ditionibus, Terris, Dominijs, alijsque quibuscumque bonis, quæ ad nos pertinere possunt, aut debent, potuerunt, aut debuerunt per defunctos parentes, vel eorum progenitores, aut prædecessores, cognatosve, quocumque modo aut causâ. Iuramus, ac pollicemur per eam fidem quâ Deo obstricti sumus, ac per eam quæ Principem decet, nostro nomine, heredumque nostrorum, ac eorum ad quos res nostra quouis iure pertinebit, numquam in ijs in ullum vendicatu-  
ros, vel asserturos, siue ea mobilia sint, siue immobilia, obligationesve, aut hypothecæ; præterquam censum supradictum quatuor & viginti milium francorum, unâ cum præfato Mercurij Dominio ac Baronîâ. Quibus duabus partibus, pro omni iure nostro, heredumque nostrorum, atque eorum ad quos quouis nomine res nostra pertinebit, contenti sumus, & per has litteras contentos nos esse profitemur: tamquam quibus condignè satisfactum sit. Atque ita se rem habere declaramus, & assentimur, testamurque, prorsus ut neque nobis, neque heredibus nostris, aut ijs quos res nostra quouis iure continget, umquam liceat quacumque de causâ refragari, vel lite contestari: siue per exceptionem deceptionis, vel illati supra medietatis pretium damni, siue quo alio titulo: neque ex argumento legis, quâ sancitur, generalem cessionem vim non sortiri, nisi præcedat specialis: cui nos renunciauimus, ac renunciamus, uti & quibuscumque iuribus scriptis, & non scriptis, nec non & consuetudinibus contrarijs, & huic nostre assensioni refragantibus: tametsi de iure eiusmodi renunciatio nobis interdicta sit; eam tamen volumus nobis heredibusque nostris, ijsque omnibus ad quos res nostra pertinebit, validam esse. Et si quando diceretur nobis malè, & minùs æquè de hereditatis portione prouisum esse; idque heredes nostri contenderent; volumus nos tum in iudicio, tum extra, cadere causâ; donantes irrevocabiliter harum litterarum vi nostro fratri prænominato liberaliter & liberè quidquid supra hereditatis nostra portionem præfatam ad nos pertinere videbitur, siue ingratitudinis causâ, siue quo alio titulo. Cuius donationis traditionem eidem per presentes facimus. Cautum etiam esse volumus, ne quando heredibus nostris, aut ijs quos quomodolibet res nostra continget, commodare possit in futurum, asserere, vel proponere, quod hoc pactum conuentum, vel transactio bonis moribus  
aduer-

adversetur, vel iuri naturali, aut gentium, scripto vel non scripto: & iurati pollicemur, per Fidem quâ Deo obligamur, eo nos numquam cufuros esse, vel alio quouis modo, exceptione, vel subsidio ullo, quo impediri hoc pactum, atque transactio, eiusve effectus possit. Cuius iurifurandi gratiam à nobis abdicamus, omnemque in integrum restitutionem, quæ à quolibet Principe impetrari à nobis aut heredibus nostris iſſe posset, quos res nostra quouis nomine contingeret, nosque & illos cuiusvis Principis potestati submittimus, siue Papa, siue Imperatoris, Regumve, aut aliorum quorumlibet, quos fratri nostro, eiusque heredibus libebit assumere, ut ij, vel eorum quilibet nos & heredes nostros cogant ad perficiendum sine contradicito ea quæ his litteris continentur: perinde ac si lege latâ, aut supremi Iudicis sententiâ pronuntiatur foret. In eum finem, & harum litterarum executionem, omnia & singula bona presentia, & futura nostra, heredumque nostrorum, & eorum ad quos res quouis modo nostra pertinebit, ubicumque locorum existunt, aut existent deinceps, obligamus. Eâ tamen lege, ut stirpe nostrâ deficiente, dicta Baronia Mercurij, & viginti quatuor millium francorum census continuè & directè ad fratrem nostrum, heredèſve illius ab eo progenitos, reuertetur sine diuisione. Et vicissim, si (quod Deus auerſat) dicti fratris heredes nobis superstitionibus deficerent, nobis nostrisve heredibus pro portione nostrâ constabit ius succedendi in dicti fratris nostri hereditatem citra ullam difficultatem. In cuius rei fidem, & ut hæc littera firma, stabiles atque inuiolatæ permaneant, & citra ullam promocationem, chirographo, ac sigillo nostro eas munimus; atque maioris auctoritatis & certitudinis gratiâ rogatos volumus dictos Dominos PATRVOS NOSTROS, Cardinalem à Lotharingâ, & Ducem Guisæ, ut sua etiam illi chirographa ac sigilla gentilitijs tesseris insignita apponere dignarentur. Quod nos Cardinalis & Dux Guisæ his precibus ac supplicationibus permoti præstitimus anno Domini millesimo quingentesimo quadragesimo quinto, die decimâ Aprilis, presentibus charissimo cognato CAROLO A LOTHARINGIA, miseratione diuinâ Archiepiscopo, & Duce Rhemensî, primo Francia Pari; Reuerendo Patri in Christo TOSSANO de Hocedy Episcopo, & Comite Tullensî, Sacri Imperij Principe, Abbate commendatario Hunnecurtensî, &c. cognato nostro IOANNE Comite Salmensî, Lotharingia & Barri Mareſcalco; Domino IOANNE de Haffonville, Lotharingia Senescallo, & Episcopatus Metensî Balliuo; Reuerendo Patri in Christo Domino PETRO du Chastellet, Abbate commendatario Sancti Martini iuxta Metas; Domino FRANCISCO de Bassompierre, Balliuo Vogensî; Domino PHILIPPO de Fresnay eius loci Toparchâ; Magistro Nicolao Mengin, rationum Lotharingia Præsîde; & Dominico Campano Iuris Doctore, Generali Lotharingie

Anno  
1545.



*ringia Procureatore. Subscriptum, IOANNES Cardinalis Lotharingia;*  
 & CLAVDIVS A LOTHARINGIA; & signatum maioribus dictorum  
 Cardinalis & Ducis Guisæ sigillis; eorum gentilitiâ tesserâ insi-  
 gnitis, ceræ rubræ impressis, duplicique funiculo intextis.

Hoc instrumentum præcedenti adieci, vt omnibus pateat, quàm  
 iniquè Anonymus scripserit suspectas esse falsitatis supremas Renati  
 tabulas, quas hîc elucet ab eius filio, Antonio II. Duce, Testamento  
 ratas & confirmatas fuisse.

## CAPVT VIII. ET VLTIMVM.

CAROLVS III. *Dux Lotharingia & Barri, iure  
 perquàm optimo Ducatus vtriusque possessionem adiuit.  
 Respondetur contrarijs Gramondi propositionibus.*

**F**RANCISCO I. Duci, Antonij II. Ducis filio, è viuis sub-  
 lato anno M. D. XLV. successit in vtroque Ducatu filius eius  
 vnicus CAROLVS II. isti deinde extincto anno M. DC. VIII. filius  
 eius natu maior HENRICVS; qui cùm diem obiisset anno  
 M. DC. XXIV. masculâ prole non relictâ, FRANCISCVS Vauda-  
 nimontis Comes, eius frater, lege patriâ, Imperiali & domesticâ  
 fultus, Dux Lotharingæ & Barri publicè fuit inauguratus. Is dein-  
 de CAROLO III. natu maiori filio ambos Ducatus dedit, & in  
 eius fauorem omni suo iuri cessit, litteris super eâ re confectis, datis  
 Nanceij die Mercurij circa horam octauam matutinam, vigesimâ  
 sextâ Nouembris, anno à Christo nato millesimo sexcentesimo vi-  
 gesimo quinto, coram Proceribus & Ordinibus Ducatum Lotha-  
 ringiæ & Barri, ad Comitata generalia eâ de causâ conuocatis. Illius-  
 que vigore denuntiationis, nouus DVX CAROLVS III. primâ die  
 Martij anni M. DC. XXVI. solenni pompâ Nanceium Lotharingæ  
 primariam urbem est ingressus, suæque hereditatis magno nobilita-  
 tis comitatu possessionem adiuit. Sequenti verò die Ordines congre-  
 gati eundem CAROLVM III. Ducem, ex proprio capite, pro suo  
 naturali ac legitimo Principe agnouerunt, Domino de Chamblé  
 Haraucurtio, Bailliuo Nanceiano, nomine Caroli Ducis ad illos  
 perorante. Vt mirum sit, Gabrielem Bartholomæum Gramondum,  
 Tholosatum Præsidentem, hac in parte nodum in scirpo quæsiuisse, at-  
 que aduersus eiusmodi acta adeò solemnia sub alieno nomine argu-  
 menta

Anno  
1625.

Lib. 15.  
p. 649.  
& seq.

menta proposuisse, quæ, ne quid intactum relinquam, subiicienda duxi cum meis ad singula responsis.

Primum est: *Non ante hanc diem legem Salicam inualuisse, apud Lotharingos.* Latæ sunt Salicæ leges à Francis Ortiuis, qui postea Lotharienses dicti sunt. Otho Frisingensis in Bauariâ Episcopus (qui inornasticæ quietis amans, senex vixit Morimundi, in Bassignio, fines Lotharingiæ Superioris & Burgundiæ Comitatus attingente; vbi & obiit anno M. C. LIX.) Lotharingos Principes vocat *Francorum nobilissimos, & SALICOS, qui eius ætate LEGE SALICA adhuc utebantur.* De Luxemburgensibus, qui Mosellanis sunt finitimi in antiquo Lotharingiæ Regno, Epternacenses Cœnobitæ in epistolâ ad Henricum sextum Imperatorem anno M. C. XCI. scriptâ sic loquuntur: *Illud summatim vestræ Celsitudini significari dignum duximus, de Lützelburgensi Comitatu, qui sint, & quam nobiles, utpote SALICÆ CONDITIONIS ET LIBERTATIS ex parte homines, qui hominum debent ad eundem Comitatum de Beneficijs, Dominatibus, & hereditario iure DE REGNO attingentibus, &c.* Insuper ex Boullayo, Antonius Vaudemontanus, ante annos ducentos, contra Isabellam patruelem suam affirmavit, *non posse FILIAS LEGE SALICA Ducatus Lotharingiæ hereditatem nancisci: ex Belleforestio, Ducatum Lotharingiæ SALICVM ESSE, nec debere ad feminam deuolui: ex Bouchelio, Ducatum illum esse DE TERRA SALICA, nec idcirco posse ad feminas transscribi.* Non igitur hoc nostro tantum sæculo apud Lotharingos inualuit Salica lex.

II. *Malè pro lege Salicâ accipi Renati Ducis voluntatem, qui Testamento cauerat, ut MASCULI in infinitum succederent: Differre legem Salicam à priuatâ hominis voluntate.* Nemo, quod sciam, voluntatem Renati Ducis pro lege Salicâ accepit, sed pro hereditariâ substitutione; nec ipse Testamenti conditor vocabulo Salicæ legis ullibi vsus est, sed substitutionis.

III. *Non posse Principes de successione Principatus decernere, legemque statuere vsui contrariam, aut priuilegijs Feudi, quæ in omne ævum sit valitura.* Non statuit legem Renatus vsui contrariam, aut Lotharingiæ priuilegijs: quin imò antiquissimam Imperij consuetudinem secutus est, quam Renatus Andegauensis proprio commodò abrogare tentarat. Illud autem eò iustius validiusque, & sine cuiusquam præiudicio, pro suis posteris statuere poterat Dux Renatus, quod ipse solus è Lotharingicâ gente superesset; adeoque vniuersa Lotharicæ Domus iura masculina, & feminina etiam, si quæ essent, ex proprio capite vnita possideret; quodque præterea ditionem suam à Carolo Burgun-

Miræus  
de Script.  
Eccles.

L. 4. c. 32.  
Vide Vind.  
Hispan. c. 5.  
p. 40.

In General.  
Lothar.

Tomo 2.  
l. 2. c. 91.  
99.  
Tomo 3.  
p. 438.

Art. 19.

Burgundiæ Duce occupatam vi armatâ recepiſſet, ſibiſque ſoli virtute propriâ quæſuiſſet, quo iure ipſe tandem vellet ad poſteros transmittendam.

IV. Lotharingiæ Ducatum eſſe Feudum ab Imperatoribus conſeſſum nulla maſculinitatis mentione. Contrarium oſtendi ex Siegberto Lotharingo, & ex Auctore Magni Chronici Belgici, apud quos, FRIDERICO II. Moſellanorum Duce mortuo, *QVIA MARES FILIOS NON HABEBAT, quibus Ducatus competeret, CONRADVS II. Imperator eius Ducatum contulit Gotbeloni, excluſis Beatrice & Sophiâ, Friderici II. Ducis filiabus.* Ad an. 1034.

V. Si valuiſſet lex Salica, redire debuiffet Ducatus Lotharingiæ ad Imperatorem, tamquam ad primum Dominum. Antiquis temporibus id fiebat; non quidem Salico iure, ſed Imperiali, dum Lotharingiæ Ducatus nondum eſſet hereditarius. Neque id factum amplius poſt Gerardum Ducem, Theodorici Strenui Ducis parentem, qui primus Ducatum iure hereditatis tranſmiſit ad poſteros tam directâ lineâ quàm laterali: unde eſt, quòd Simoni II. Duci abſque liberis deſuncto anno M. CC. VII. ſucceſſit Fridericus III. eius nepos ex fratre Friderico Comite de Biſſche. Ruſum anno M. CC. XX. cùm Theobaldus I. Dux impolis exceſſiſſet, Matthæus II. eius frater ſine controuerſiâ Ducatum adeptus eſt. Præterea in Tranſactione Norimbergicâ inter Ferdinandum I. Romanorum Regem, & Antonium II. Lotharingiæ Ducem, initâ anno M. D. XLII. hæc inter alia ſanxit Rex Ferdinandus: DVCATVS LOTHARINGIÆ, cum ſuis appertinentijs, LIBER, & NON INCORPORABILIS DVCATVS erit, & manebit ſemper: & à Cæſarâ Maieſtate, Nobis, & Electoribus, Principibus, atque Statibus Imperij, pro LIBERO, & NON INCORPORABILI DVCATV, Superioritate & Principatu recognoſcetur, nominabitur, & habebitur. Principum Imperij vacuæ hereditates ordinario caduci iure ad Imperatorem tamquam ad ſupremum Dominum deuoluuntur, ruſumque incorporantur Imperio, à quo primitus emanarunt, in aliam familiam, ſi lubet, transferendæ. At Norimbergicâ pactione Duci Lotharingiæ indultum eſt, vt eius Ducatus eſſet membrum Imperij liberum, Imperio nunquam incorporabile, hoc eſt, vt perpetuò tranſiret ad heredes: ita vt ab eius ſanguinis ſtipite non recederet: nec è viujs excedente ſine maſculis Duce, caducum ius locum haberet, ſed ad eiufdem ſtirpis & agnominis proximiorum in aſculum Ducatus pleno iure deferretur, fide Imperatori & Imperio ſemper ſeruata; vt fecere hæcenus Lotharingiæ Duces, & præ alijs Sereniſſimus CAROLVS. Dux modernus;



Arbore 2. cui R. P. Ioannes Gans de Societate I E S V, Imperatoris Confessa-  
 Lothar. rius, in Arboreto Austriaco, hoc breue quidem, sed honorificum  
 meritò tribuit elogium: *Qui Lotharingicam Domum, fidelitate erga  
 Ferdinandum Casarem celeberrimus, mariæ sustentat.*

VI. & vltimò, *Accedere debuisse consensum Imperatoris pro Lotha-  
 ringiâ, & Christianissimi Regis pro Ducatu Barrensi; quorum causa, vt  
 supremi Domini sunt, præcipuè agebatur.* Pro Lotharingiæ Ducatu non  
 erat necessarius Imperatoris consensus, quandoquidem contra Im-  
 perij legem non peccabatur; imò eius præscriptum sanctioque ad  
 amussim obseruabatur. Idem diço de Ducatu Barrensi, qui merè  
 est Imperialis, vt aliquando, si Deus vitam indulerit, perspicuè  
 ostendam.

F I N I S.



INDEX

# INDEX CAPITVM.

- C**APVT I. Lotharingæ Superioris Ducatus ex lege Imperij ad feminas non deuoluitur. Pag. 3.
- C**APVT II. Prius Anonymi argumentum ab Idâ desumptum, contra Lōtharingæ masculinitatem, dissoluitur. 6.
- C**APVT III. Respondetur alteri Anonymi argumento, de Isabellâ Caroli primi Ducis filiâ. 9.
- C**APVT IV. Fridericus VI. fuit Dux Lotharingæ ex proprio capite, non vxoris Iolandæ Andegauensis, aduersus Anonymum. 16.
- C**APVT V. Vnio perpetua Ducatum Lotharingæ & Barri; vterque Principatus est masculinus ex FAMILIARI IVRE. 19.
- C**APVT VI. Contestata denunciatio Claudij Guisæ Ducis pro Testamenti Renati Ducis obseruatione. 28.
- C**APVT VII. Charta Transactionis, quâ constat Antonium II. Ducem, Renati parentis vltimam voluntatem Testamento confirmasse. 29.
- C**APVT VIII. CAROLVS III. Dux Lotharingæ & Barri, iure perquàm optimo Ducatus vtriusque possessionem adiuit. Respondetur contrarijs Gramondi propositionibus. 33.

Clarissimi , doctissimiq̃ue viri , D. Antonij de  
Fuertes & Biota , I. V. D. Hispani , Regis Con-  
filiarij & Quæstoris Mediolanensis,

I V D I C I V M.



VIDE legi, ac penitiùs excuſſi. Opusculum, cui titu-  
lus, *LOTHARINGIA MASCVLINA*, Auctore  
Nobiliss. Equite D. Ioanne Iacobo Chifletio, Regio  
Archiatrorum Comite. Quo quidem in argumen-  
to ita versatus est solertissimus Scriptor, ut, quod in eruditio-  
ne palmarium est; multa eaq̃ maxima paucis complexus fue-  
rit singulari methodo ac stylo. Leges siquidem cum Legibus  
frustrà sæpè componimus; sicq̃ interdum multa agendo nihil  
agimus: sed membranas schedasq̃, cum veteres, tum novas  
in comperto habere, Principum Genealogias recto tramite du-  
cere, in Chronologiam non peccare, Topographiam nosse, id  
unum, si quid aliud, politicis studijs, meâ quidem sententiâ,  
apprimè utile est; in quo Iureconsulti aut ferè iciuni, aut ut  
plurimum hallucinantes. Unde aui nostri aduersissimis tempo-  
ribus vel hoc nomine gratulandum puto, quòd eiusmodi præ-  
claris scriptionibus occasionem præbuerint; optoq̃ ac voueo  
quàm plurimos esse, qui semitam eandem cum doctissimo vi-  
ro ingressi, eius vestigijs inhæreant, versenturq̃ in parâ in-  
dustria curriculo, non sine ingenij atque eruditionis laude. Ita  
censui, dum tot aliorum in publicam perniciem scripturien-  
tium me tadet, pigetq̃. Bruxella VIII. die Nouemb. anni  
Christiani M. DC. XLVIII.